

東
華
續
錄

東華續錄

咸豐二十一

臣王先謙敬編

臣陶澐宣恭校

三月乙巳朔 皇后祀 先蠶○楊殿邦奏賊於二十二日蔽江

而下臣卽飭令瓜州艇船在江面接仗打沈賊船無數不料申刻

風轉賊船順流而下我兵眾寡不敵賊勢乘機擁入隨飭瓜口安

置之徐州兵二百名開礮轟擊無如賊數眾多復由儀徵旱路分

道而來水陸並進直抵揚城我兵力弱不能兼顧揚城隨於二十

三日失陷臣折回高寶一帶擇要守禦沿途察看情形河隄高出

於城地勢城身均皆低窪雖議固守實無把握因思淮安水利向

由牐壩啟閉爲洩蓄見在各路大兵未到兵力單弱斷難守禦不

若啟放各牐壩洩盡淮水使賊舟滯行不能上竄祇須在兩岸堵

禦較易爲力若賊匪竄至高寶或竟決洪湖使水下注該匪自當
全股淹沒惟水係河臣專管臣當赴浦密商籌辦一面飭但明倫
駐紮高寶一帶多雇壯勇先行擇要防堵臣亦卽由浦趕緊南下
在淮安一帶招募糧船水手一千名鄉勇一千名交前任淮安府
知府福楙統帶可資得力並督同該司在高寶堵禦請旨迅飭各
路大兵趕緊前來庶可併力前進臣未能竭力堵禦以致府城失
守應請從重治罪 上諭內閣覽奏憤恨之極逆匪連檣東竄疊
次諭令琦善陳金綬督兵前進嚴防江北並分兵兼顧儀徵瓜州
一帶琦善陳金綬等如果迅速應援猶可扼要堵禦何至賊匪竄
入揚郡陳金綬著卽摘去頂帶戴罪圖功琦善前已革去都統銜
比寺皆加重懲轉得置身事外著該大臣等迅督大兵前往堵剿
如再延誤自問當得何罪楊殿邦著革職畱任仍令會同楊以增

極力防守毋令再失機宜致干重罪○諭軍機大臣等本日據楊殿邦馳奏揚州失守覽奏楊勝愼懃前經疊次諭令琦善陳金綬等嚴防江北杜賊奔竄如果該大臣等迅速進兵相機防剿何至貽誤至此揚州失守則淮徐一帶在在堪虞著琦善陳金綬勝保卽統帶大兵會同楊殿邦楊以增探明何路緊急卽由何路進攻其黑龍江吉林馬隊官兵諒已行抵江北一帶著卽飛催進援以遏賊鋒軍情變幻靡常該大臣等務須相機應變力遏賊匪北竄之路萬勿再有延誤致干重罪將此由六百里加緊各諭令知之○諭楊殿邦馳奏揚州失守一摺所稱啟放各牐壩洩盡淮水使賊舟滯行不能上竄止可如此辦理若賊至高寶或竟決洪湖使水下注俾全股淹沒等情事至危急或可相機應變但恐賊匪未能全股淹沒而吾民又遭昏墊之苦朕心益增憫惻該督等斟酌

行之不必拘泥陳金綬所帶之兵在琦善前路應由何路上援並
著知照飛催所募水手鄉勇卽交前任淮安府知府福楸管帶以
資堵禦將此由六百里加緊各諭令知之○丙午恭奉 孝和睿
皇后神牌升祔 太廟奉安 神牌於 奉先殿○諭軍機大臣
等陸應穀奏請添調重兵一摺逆匪於二月二十三日攻陷揚州
彼猖已極該撫所陳軍營以前貽誤及見在籌備各情形不爲無
見山東與江蘇毗連最形喫重見已調遣重兵扼要駐紮至河南
與安徽接壤亦應一體嚴防遏賊由滁州分竄之路所有前次調
赴信陽及南陽等處防兵著該撫卽酌量調赴豫皖交界地方嚴
密堵禦並隨時查拏奸細緝捕土匪無令涸入竊發將此由六百
里諭令知之○新授兩廣總督葉名琛奏報謝恩得旨總督統轄
兩省事繁任重兩撫臣俱應和衷徐廣縉在粵東時視西省之事

似非伊應辦汝當深戒之○調山西兵三千名陝甘兵四千名赴山東防堵○丁未以孝和睿皇后升祔禮成頒詔天下覃恩有差○諭內閣惠親王綿愉自道光二十九年冬開奉旨恭理喪

儀三年以來事事無不盡心辦理悉臻允當且勤慎小心並無錯誤追思我皇祖妣在天之靈必能欣慰今大事已畢若與在廷諸臣一律給予加級於人子事親之道未盡允協朕不忍施此恩王亦不忍受此恩惠親王著勿庸加級賞給朕用龍袿一件藍色龍袍一件以示殊眷○諭前經迭降諭旨嚴申門禁因思六科每日有給事中一員值宿其各科輪班值宿之筆帖式亦有稽察巡查之責著都察院堂官轉飭該給事中督率值宿之筆帖式於一切閒雜人等加意稽查無稍疏懈該給事中及該筆帖式等有曠誤不到者卽行指名嚴參○陳金綬勝保奏臣等於二十五日

距浦口二十里之護國菴紮營探聞浦口一帶已無浮橋賊船在
彼停泊或數十隻或百餘隻不等並於北岸江邊創挖陷坑徧插
竹籤以防我兵進戰臣等會商於二十六日寅刻督飭將弁分隊
進兵已刻馳抵浦口鎮城內外賊匪紛至我兵分布四面臣陳金
綬督兵圍攻賊眾撲出南關迎拒我兵奮力擊殺臣勝保督兵繼
之忽聞南岸賊營礮聲不絕江邊帆檣絡驛駛泊北岸急令將弁
繞出賊前截擊並分兵由東關衝入追殺該逆勢不能支紛紛逃
竄奔赴江岸擁上賊船盡行開赴下游一帶其計斬獲黃巾賊匪
首級二十餘顆生擒十餘名鎮城業已收復惟該逆未受大創臣
等又不克覓船渡江曷勝焦憤見聞賊船分赴下游揚州鎮江俱
極喫緊又恐南岸賊匪併力復來更不能不加意防範應候琦善
到浦駐守臣等卽當移兵直赴下游北岸一帶擇要防剿儻能渡

江進攻隨時相機辦理斷不敢稍事遷延 上諭江北之兵初次

接仗尙爲得手惟逆匪總未大受懲創見在竄至揚州著陳金綬勝保督帶大兵星速赴援會同楊殿邦楊以增擇要堵截若能痛加剿洗出力將弁准其據實保奏並著琦善督兵迅速接應毋得稍有遲誤○諭周天爵奏剿捕土匪情形一摺皖省自安慶失守後土匪聞風四起宿州懷遠亳州蒙城靈璧等州縣尤多著名捻匪聚眾搶劫經該侍郎遴派文武員弁帶領兵勇分投擒捕先後斬獲刁生牛文禮等五百九十八名北路土匪爲之斂迹其南路各屬聚眾肆擾之案不一而足見經該侍郎飭令遊擊劉玉豹等分路兜擊並督率義勇親往廬鳳一帶鈔剿務將著名各犯悉數殲擒並將定遠之鹽梟合肥之土棍巢湖之匪船全行剿洗毋畱餘孽以懲兇惡而靖閭閻○諭軍機大臣等陳金綬勝保進剿浦

口賊匪獲勝一招此次接仗尙爲得手而逆匪總未大受懲創昨據楊殿邦奏揚州已於二十三日失守已諭令琦善陳金綬等趕緊進攻陳金綬等諒已接奉前旨著卽統帶大兵迅赴揚州痛加攻剿使賊匪不敢占踞揚州庶可杜其北竄之路見在淮徐一帶萬分喫緊專待陳金綬等帶兵赴援切不可再有遲誤致干重咎將此由六百里加緊各諭令知之○諭呂賢基周天爵奏探報軍情開單呈覽一招並請將署總兵仍行守護糧臺等語據稱賊本不多其黨與皆係裹脅而來往往乘閒逃回請布告賞格俾脅從之眾或在賊中殺賊以爲內應或將賊中虛實密報大營或於臨陣時倒戈向賊均赦其罪而賞其功等語前曾迭將諭旨令統兵大員解散脅從懸賞殺賊此時逆匪攻陷揚州時勢緊急更應防其迫脅良民勾結滋擾卽著該督撫等剴切宣諭設法招徠妥爲

辦理徐州爲居中扼要之地設立糧臺總兵聶金鏞著卽畱於該處於禦賊守餉兩有裨益又據周天爵奏勦捕土匪情形並酌辦宿州散放口糧銀兩各摺片安徽北路土匪該侍郎痛加懲創稍知斂迹其南路各股土匪見在周天爵親赴廬鳳一帶鈔勦務卽督飭各州縣並遊擊劉玉豹等趕緊搜捕毋令竄過滁州與揚州儀徵一帶賊匪聯爲一氣其與山東江南毗連各處著隨時知照楊殿邦楊以增李德一體嚴防以期聲勢聯絡呂賢基卽暫駐宿州以資坐鎮俟周天爵回宿後再赴各屬巡查團練事宜仍先與各紳耆等商妥辦至宿州城垣傾圯周天爵請以所放一月口糧銀一萬八千兩作爲修城濬濠增置敵臺之費俾四鄉饑民趨赴作工卽可以工貸賑並著與李嘉端斟酌妥行其老弱婦女不能趨工者如何不至向隅之處卽著李嘉端妥速籌辦毋令一夫失

所本日據御史陳慶鏞奏鹽知事張翊國呈遞防河節略等件一本又信二函所稱有湖南人李廣與揚州紳士江壽民交接並江壽民前往賊營犒師等情實屬駭人聽聞其節略內稱自河南至淮揚黃河兩岸千餘里內可用人才不少開具姓名年貌住址以其土著之人守險易於得力等語此等人民其平日傲岸於鄉里間必有地方好事之眾從而附和之當此用兵之時兩河土匪又多乘閒竊發若將單上著名之人收爲我用不無裨益著該侍郎該督撫等密行訪察如果志在效用其心無他不妨設法羅致酌量差委揀選知縣臧紆青一員曾經周天爵保奏見在何處是否在宿遷本籍辦理團練著周天爵查明差遣委用陳慶鏞摺並節略信件均著摘鈔閱看將此由六百里各諭令知之○以恭題神主賞裕誠 御用袍加賈楨太子太保○以 孝和睿皇后奉

安禮成予在事王公大臣官員 昌陵 昌西陵值班守護官弁

加級升敘拜唐阿等一月錢糧及校尉民夫銀○賞恭送 神牌

還京王大臣官員加級兵丁半月錢糧及校尉銀直隸辦差員弁

加級兵丁一月錢糧○予安徽殉節從九品高文彬等世職附祀

蔣文慶祠○戊申琦善陳金綬勝保奏浦口收復後 臣琦善卽於

次日辰刻親督弁兵馳抵浦口江岸察看見江北有賊船二十餘

隻停泊沿江葦垛林立在後賊船多隻均爲葦垛遮蔽 臣陳金綬

等正在江岸整隊彼此晤商以賊人隱匿舟中難於攻擊必須誘

其上岸方可乘機剿除 臣陳金綬卽帶弁兵由浦口東山外越赴

江邊出其不意拋擲火彈將停泊賊船二十餘隻焚燒船賊驚起

正思抵敵火已延發該逆紛紛墜水人船同時俱盡復督率弁兵

馳赴西邊江岸將葦垛數處亦用計燒毀 臣勝保帶兵接應而江

心及南岸停泊賊船但放大礮並無船隻前來撲救亦無賊匪上岸迎拒我兵多方引誘不出江面又寬火箭遠不能及祇得收隊伏思賊匪恃舟爲藏身之固此時京兵已抵北岸大江遙隔無船可渡若徒事堵守轉中該逆牽掣之計見在會商臣陳金綬臣勝保卽於二十九日先行帶兵馳赴六合儀徵一帶追剿臣琦善飛催吉林黑龍江弁兵趕緊前來酌量派撥畱守後亦卽馳赴下游以爲接應至前調之山東西安兵探無確耗由豫改道之黑龍江官兵止有第三起德興阿趕到其西凌阿明慶管帶之兵與吉林官兵均尙未到惟有趕緊迎提一面相機剿辦又奏聞該逆將船中輜重搬運江甯省城其船隻不肯輕棄每於上下游肆意游蕩見在揚州被擾鎮江文報不通蘇松一帶處處可危卽竭力堵禦該逆不能竄擾下游而上游未被蹂躪之區難保不肆行紛竄四

川爲腴潤之鄉一江直達防範尤未可稍疏近來各省皆以守城爲重待其兵臨城下始與抵禦爲時已晚惟有於沿江各處覓備船礮先於江心迎截衝擊一面固守城垣按斬奸細庶不致處處落後以冀賊可鏟除上諭軍機大臣等揚州失守淮徐一帶萬分喫緊該大臣等統兵嚴防江北是其專責見在江浦雖經收復揚州仍被占踞淮徐兵力甚單急盼大兵進攻遏其北竄陳金綬勝保旣先行追剿著琦善一面飛催未到官兵一面督率將弁前往接應務將揚州收復無令賊匪紛竄淮徐切不可官兵尙未到齊藉詞再有延誤○己酉諭內閣朕聞山東江蘇接壤地方饑民沿途乞食十百爲羣多係老幼婦女繞路號號不可勝數實堪憫惻上年因河南決口山東江蘇被災處所迭經降旨截漕賑濟安輯窮黎本年二月復諭令楊以增楊文定派委賢員分投履勘

各就地方情形妥爲辦理見在豐工合龍田廬雖已涸復而無業窮民仍如此流離顛沛卽籌辦團練或可收集壯丁而老弱婦女終無生理若不急籌撫字爲民父母何以爲懷著楊以增李德卽行設法妥爲賑恤並派委道府大員督率州縣會同公正紳耆實心經理以蘇民困而靖地方○庚戌諭內閣前有旨令各直省仿照嘉慶年間堅壁清野之法辦理團練令武英殿刊刻明亮德楞泰築堡禦賊疏龔景瀚堅壁清野議及示諭條款頒發通行復令將本年兩次諭旨一併刊刻冠諸簡端本日據惠親王等奏業已刊板刷印裝成樣本進呈著卽頒發各直省督撫廣爲刊布督同在籍幫辦團練之紳士實力奉行各就地方情形妥爲布置但期守衛鄉閭不必拘執成法團練壯丁亦不得遠行徵調保民而不致擾民行之日久方無流弊一切經費均由紳民量力籌辦不得

假手吏役如地方官有藉端苛派勒捐等弊卽著該督撫據實嚴參至各省所保紳士人數眾多其中辦理不善不協鄉評及衰老不能任事者該地方官查明卽令毋庸管理至近賊地方紳民團練尤須官兵應援方足以資捍禦統兵大臣暨該督撫等務當相度緩急撥兵策應俾兵民聯爲一氣庶眾志成城人思敵愾茲小醜不難剋期蕩平也將此通諭知之○調密雲駐防兵一千名來京備用○辛亥 上祀 先農親耕藉田三推畢加一推自是以爲常○諭軍機大臣等楊以增奏揚州失守籌防江北一摺琦善見抵浦口陳金綬勝保已於二十九日先行啟程前往儀徵復有旨諭令繞赴清江淮安一帶迎頭截擊該督等一面設法嚴防一面飛催陳金綬等援兵合力勦辦淮河以下水勢湍急賊踪斷難上駛其由陸路分竄者似非大股陳金綬所帶之兵足敷抵禦

楊殿邦前奏自浦回淮後招募水手鄉勇亦可以助兵力著卽會同擇要堵禦萬不可使其踰淮而北黃河襟帶雖云天險防守總恃人力若不截之下游一經竄至清江愈難著力該督等總須加意慎重勿致疏虞江南文報此時必多梗阻卽飭地方官探明水陸道路何處安速卽由何處轉遞各省解往餉銀尤關緊要儻有疏失貽誤非輕亦著一體妥籌迅速解運向榮渡江見在何處楊文定防守鎮江情形若何賊踞金陵江面上下我軍船礮是否可以轟擊著卽探明具奏另片奏製造木礮及豫挖地道各等語所辦甚好但不知究能得力與否務期密爲布置萬不可爲賊所覺致誤事機將此由六百里加緊各諭令知之○壬子尊藏 孝和 睿皇后 玉冊 玉寶於 太廟後殿○諭軍機大臣等前經迭次諭令向榮進攻江甯並據向榮奏在東路孝陵衛一帶駐紮扼

賊竄擾蘇常之路本日琦善奏鎮江又復失陷江甯孝陵衛壤接
句容爲內通蘇常要道該逆既陷鎮江難保其不由丹陽直趨常
州則蘇杭各郡勢在危迫楊文定久無報到見在何處鎮江係何
日失事城中文武官員是否先已遷徙該大臣相距較近當已探
悉其江甯城中小文武官員如何下落迄今亦未據查明具報
賊匪於前月二十三日攻陷揚州其分擾江南江北是否意在北
竄抑欲牽掣北軍專擾蘇杭其大隊首逆尙在江甯與否向榮營
中兵勇一萬七千餘名帶兵提鎮將弁均係久歷戎行若能相機
攻剿不但南岸賊匪不敢窺伺蘇常卽見竄北岸揚州一帶之賊
亦易剿除許乃釗見署巡撫更當設法保衛蘇州省垣所有先經
雇覓之上海夾板船及廣艇等船礮計已早到江面向榮所調上
游湖南船礮亦當駛到若水陸夾攻可期得力已飭陳金綬勝保

扼守江北徑赴揚州琦善相機策應向榮與許乃釗卽熟商江南如何兜剿不令更致蔓延並可一面知照江忠源迅帶兵練前來上下接應以期迅殄妖氛怡良到江南尙需時日所調福建官兵著向榮許乃釗飛催前來爲蘇常應援並嚴飭地方文武隨時嚴拏奸細以防內應仍將見辦情形迅速具奏將此由六百里加緊各諭令知之○諭琦善奏籌議畱防江北及探聞賊情一招又片奏拏獲奸細提訊供情披覽均悉揚州失守淮徐戒嚴迭諭令該大臣等相機援應陳金綬勝保自以急剿揚州之賊爲要其所帶官兵有六千七百餘名亦不爲單弱其未到各路官兵旣經琦善加緊催提當可陸續趕到所需鑼鍋帳房鉛丸火藥等項已有旨令陸應穀嚴飭軍需總局趕緊支應矣賊氛日熾若再遷延其勢幾不可問陳金綬勝保旣抵揚州著卽剋期克復會同楊殿邦楊

以增扼要防剿琦善仍遵前旨隨時策應該逆聲東擊西避實擣虛是其慣技或由陸路或由水路應如何防堵截擊軍情變遷靡定在該大臣等熟籌緩急退賊北竄不致貽誤事機方爲盡善其馬隊官兵陸續到齊如何隨地布置均著酌量辦理鎮江失守未據奏報何日失事情形如何楊文定見在何處著一併查明具奏至查拏奸細尤關緊要除已獲各犯分別正法訊辦外仍著隨時嚴拏懲辦毋稍疏懈將此由六百里加緊各諭令知之○諭僧格林沁裕誠奏覆查礮位一招所有八旗漢軍礮位除每年照演外其久未出演之礮位應如何輪流出演著各該都統等速議章程具奏至礮車間有損壞亦應酌量估修覈實辦理鑲紅旗洋礮一位亦著酌配鉛藥成數試演將此各諭令知之○諭倪良燿奏請申嚴戎律一摺所奏雖不爲無見但多係空言殊少實事如所稱

營伍積弱及軍務畏葸均係過去之事得失之故較然易見至蘇省籌兵募勇則毫無布置惟稱倉卒不能見功先爲卸責地步此等無謂之詞有何裨益江浙海運係該藩司專辦之事屢次陳奏含混遷延並不實力籌辦所稱委員催提誠恐未能得力等語尤爲荒謬如果事事聽之委員又何必特派大員總司其事兩省漕糧關繫正供業已遲誤至此尙稱不容稍有遲誤不知該藩司何顏出諸口也見已命許乃釗暫署江蘇巡撫該藩司卽將浙省運到米石並蘇省起運未完米石仍遵迭奉諭旨趕緊催辦務令剋期放洋儻再稍有貽誤朕必將倪良燿從重治罪至浙省抵滬米石前據黃宗漢奏已有三十餘萬石而該藩司始則奏稱六萬餘石今又奏稱十三萬餘石何以總不相符浙江江南兩省由陸赴津之道員究已行抵何處該員等所帶銀兩係備剝船等項之需

見在欽派大臣已赴天津而此項銀兩未能應手著卽迅速催趲毋任沿途遲滯此後沙船放洋及見辦情形均著隨時馳報不得再有掩飾推諉致干重罪將此由六百里傳諭知之○命湖北按察使江忠源馳赴江南幫辦軍務○理藩院尙書吉倫泰卒予祭葬諡敬僖○以恩華爲理藩院尙書由兵部左侍郎遷○以許乃釗暫署

江蘇巡撫

由內閣學士署

○癸丑諭內閣張亮基等奏土匪滋擾見在勦

辦一摺湖北通城縣西北鄉土匪因抗糧糾眾肆行搶劫該署督等見派臬司江忠源帶領兵勇馳赴該縣勦辦江忠源昨已有旨令馳赴向榮軍營幫辦軍務見在通城土匪儻勦辦需時著該署督等另派大員接辦仍令江忠源卽赴向榮軍營毋稍遲延至該縣匪徒抗糧滋事實屬目無法紀著卽按名拏獲嚴行懲辦並查明起釁根由如係官吏苛勒激成事端一併嚴參懲治署通城縣

知縣林之華輒因徵漕進省請示辦理殊屬不知緩急著先行交部議處○諭前因山東江蘇接壤地方窮民顛沛流離降旨令楊以增李德安籌賑濟茲據雷以誠晉康奏經過往平東平東阿汶上等州縣途閒饑民紛紛求食至滋陽鄒縣及滕縣嶧縣邳州等處男婦老幼十百成羣攀轅乞丐詢之途人僉稱數年來迭遭水旱十室九空自上年冬閒至本年正月凍餒尤不堪言狀當此青黃不接之時少壯俱已逃亡老穉不能相顧若不及早撫綏勢必盡轉溝壑等語所奏自係實情朕披覽之餘不勝愴惻楊文定見辦軍務未能兼顧地方事宜著楊以增李德仍遵前旨迅速設法賑恤並飭委員等妥爲經理俾無業窮黎不致日久失所用副朕勤恤民隱有加無已之至意○楊文定奏前因江甯失守曾經奏明陸路由副都統文藝統兵扼要設防臣由水路親督艇師各船

防守瓜口乃旗營各弁兵竟未在山背頭紮營二月二十一日探

聞賊船東下已過儀徵是晚適漕

臣

咨令蘇松鎮總兵葉常春到

鎮統帶水師次日辰刻遙見賊船百餘隻艇船卽迎上開砲擊破

賊船十餘隻並斃匪數十人賊遂敗逃艇船追至黃天蕩賊匪多

棄船登洲後復來大股賊船三四百隻艇船順流退至金山下屯

紮斯時若陸路有兵助戰尙可有爲乃

臣

遣人登山瞭望並不見

岸上有一人一騎爲水師助勢賊雖不敢漫船而過已分股由鮎

魚套登陸至金山放火艇船驚恐亦卽退過焦山賊復至北固山

放火直入鎮江府城城內守兵暨副都統早已不知所在遂爲賊

踞二十三日葉常春恐賊船繞襲其後並未知照到

臣

卽自坐艇

船下行各船隨之復退二十餘里

臣

恐去賊過遠無從牽制賊匪

使不得遲次日復將艇船紮近焦山口門

臣

當此欲進不能欲退

不可之際惟有移紮江陰靖江江面探明南北道途權通文報仰
懇 皇上嚴催統兵各大臣剋期前來 臣 統帶各師船繼進水陸
交攻庶可使江路開通各城克復 上諭楊文定奏瓜口鎮江失
守一摺覽奏憤懣之至賊船越過瓜口直入鎮江該府爲南北江
口咽喉朕早料賊必窺伺屢次諭令楊文定等嚴密籌防如果布
置得宜何至遽行失守楊文定督率無方總兵葉長春督戰不力
咎實難辭均著革職暫行畱任以觀後效向榮統帶大兵駐紮孝
陵衛一帶防守江南見在鎮江失守著卽酌撥將弁帶兵會同楊
文定所帶師船水陸夾攻剋期收復毋得稍有遲誤副都統文藝
見在何處並鎮江城內文武各員及旗營各兵下落均著楊文定
查明具奏○諭張亮基等奏查明已革湖北提督及參將下落等
語前因岳州失守迭經降旨諭令該督撫等查明已革提督博勒

恭武如何下落迅速具奏茲據該署督等奏稱該革員自岳州潰
逃後帶兵徑回武昌又棄軍私回漢川復藉養病輒回穀城提督
本署今又欲前赴江南軍前報效種種荒謬實出情理之外該革
員以湖北提督大員奉旨防守岳州乃始則見賊先遁繼復展轉
偷生若不明正典刑何以申嚴紀律博勒恭武侯提解到省著卽
處斬毋庸再行請旨至署岳州參將阿克東阿據營兵李廷徵稟
稱賊匪攻破府城該員當時陣亡著卽查詢明確如果該員實係
抗節捐軀卽行奏明請卹○諭軍機大臣等楊文定奏瓜州鎮江
失守一摺覽奏殊深憤懣瓜州鎮江爲南北水路咽喉屢次諭令
該署督等豫爲籌防嚴密堵禦乃賊匪乘船東下葉長春統帶水
師楊文定督飭艇船迎剿忽因風信全無艇船退下以致賊匪登
陸直入鎮江而旗營弁兵又未在山頭紮紮營毫無準備一至於

此楊文定已退至江陰並非要路退敗之餘更無把握向榮駐兵江南所有南岸堵剿事宜是其專責該大臣見駐孝陵衛原以防賊南竄之路今鎮江已失亦可由丹陽直達蘇常著向榮斟酌情形如能撥將弁帶兵扼要攻守或克復鎮江使賊不得進擾蘇常則向榮一軍庶不至腹背受敵該大臣總當統籌全局勿爲浮言所惑楊文定亦當收集殘兵扼守要路勿久處江陰置省垣於不問所調上海船隻諒已早到著與向榮陸路之兵合力夾擊以贖前愆江蘇省垣防守事宜著許乃釗悉心籌畫毋誤事機南北文報亦著另設驛站以通往來將此由六百里加緊各諭令知之○陳金綬勝保奏_臣等自收復浦口後卽與琦善籌商先由六合一帶渡江與向榮合力夾攻琦善馳紮浦口隨後接應_臣等卽日由陸路帶兵東下行抵六合縣地方據報逆賊分股竄擾揚州儀徵

等縣文報不通郡城已經失守並傳聞該逆僞南王僞西王等率賊眾萬餘盤踞郡城四出滋擾揚州爲北岸重地且自該郡而東爲邵伯高郵寶應等處均係糧食聚會之區再東爲清江浦湖河襟帶地接山東係北上大道此正北路最爲喫緊之時臣等惟有激勵將士設法進剿並飛調馬隊前來接應以期挫賊兇鋒見聞大路俱有賊探窺我消息已帶兵由六合縣屬之樊家集陳家集小路閒道馳赴揚州出其不意如能及早克復卽當迅由瓜州南渡進逼金陵會合夾擊趕緊掃蕩妖氛斷不敢稍有拘泥致誤事機上諭揚州爲北路咽喉最爲喫緊自應先其所急若能迅掃賊氛收復揚郡以後何處緊急卽由何路進兵斷不可稍有拘泥軍情變幻無定旬日以前江北江南原應兼顧辰下則北方爲不可緩之勢設或逆匪進撲淮安該處兵力甚單惟盼陳金綬等勁

旅救援所調馬隊兵丁前來接應必可得力本日又據楊文定報鎮江失守該署督已退至江陰所調火輪船隻未知何日可到見在京口以內並無守兵已諭令向榮酌量撥兵應援陳金綬等進勦江北必須賊匪退出瓜州始可兼顧金陵鎮江等處耳文報儻有梗塞著卽籌改道馳遞毋致遲延將此由六百里加緊各諭令知之○諭據葉名琛柏貴奏廣東省城自聞武昌安慶失守訛言紛起人心頗覺震驚叕叕上年業經回國頃復駛回香港等語見在逆匪猖獗江甯揚州鎮江相機失守廣東人情浮動更恐遇事生風馮雲山之子馮亞養在外逃回必非無故該督等當嚴查奸細消患未萌尤當鎮定人心勿爲流言所煽惑至叕叕照會旣未明言何故自當示以鎮靜前定條約計十二年後再言更易見已屆期著與柏貴等密爲籌度以備不虞南韶匪徒尙在江西交界

處所出沒靡常著嚴飭鎮道大員隨時剿捕該督回省後如該處有緊要情形仍著星馳督辦又另摺奏查明師船笨重宜於外海而不宜於內河能否駛入長江尙難豫定快蟹大扒等船原係內河巡緝之用難出外海更無論遠涉重洋自係實在情形著該督等悉心體察如果各師船調赴江南難期得力徒滋糜費卽著毋庸調撥○以常志爲兵部左侍郎

由內閣學士遷

○以初舉耕藉禮執事

整齊于王大臣等加級餘賞賚有差○調盛京兵八千名來京察哈爾兵四千名赴張家口備用○甲寅向榮奏逆匪竄踞金陵於土城一帶紮營堵我進兵之路

臣

當將各營兵勇分作十隊於二十六日五鼓分路直攻賊營開放槍礮該逆不敢拒敵紛紛棄營遁去立將土城一帶奪回就地趕築營壘分紮要隘適鍾山賊營有賊四五千蠶擁而來當令官兵迎頭開放槍礮交戰時許該逆

不敢抵敵全行敗走我兵奮勇追殺斃賊無數斬取首級十餘顆二十九日寅刻傳令各營出隊攻打鍾山各賊營兵勇直逼賊營環攻該逆並不出戰僅於營內用礮環擊我兵力難攻入隨令兵勇佯爲退去誘其離巢該逆見我兵退後果擁出三四千眾分股趕來誘至里許兵勇返身擊殺賊眾亦放槍礮死拒該逆退而復出出而復敗傷斃不少戰至巳刻仍敢拌死力鬪臣卽指揮兵勇爲兩路分左右翼從嶺腳鈔上親自率領一軍從中路直衝而上連斃數十賊該逆勢不能敵紛紛逃潰見在我兵已逼至孝陵一帶紮營趕緊設法相機進剿能將鍾山奪占卽可俯瞰全城克復金陵較易得手 上諭內閣見在我兵已逼近省城紮營著該大臣卽督飭提鎮將弁趕緊相機乘勝進剿先將鍾山攻奪則負隅羣醜自不難剋日殄除也○諭軍機大臣等向榮奏連日接仗獲

勝情形並調派兵船防剿各摺片已明降諭旨令該大臣乘勝進
攻矣逆匪占踞江甯雖經我兵連日接仗屢次獲勝仍未大加懲
創賊匪見在分股滋擾揚州及鎮江各處則江甯城內外屯據之
賊其勢亦分正可趁此機會設法進攻若此處進剿得手則揚州
鎮江分股之賊自必聞風膽落卽常州蘇州一帶賊匪亦不敢深
入見在陳金綬統帶大兵已馳赴揚州遏賊北竄之路楊文定退
至江陰鎮江京口與瓜州南北阻隔該大臣若能設法水陸夾擊
方可制勝所需上海火輪等項戰船本日復諭令吳健彰趕緊雇
覓此項船礮是否刻下趕到甚爲懸念向榮及許乃釗惟當設法
權宜辦理勿失事機至常州爲蘇浙門戶該大臣已派總兵李瑞
等帶兵二千前往著卽隨時飭令嚴密防守毋得稍有疏虞總之
南岸攻剿得力則牽掣賊匪不暇北竄向榮陳金綬等分剿兩岸

務宜聲勢聯絡察看緩急一切調度想必能統籌全局也將此由六百里加緊諭令知之○調許乃普爲刑部右侍郎以孫銘恩爲兵部右侍郎由內閣學士遷○調歸化城兵二千五百名綏遠城兵五百名熱河兵一千名赴山東江南交界地方備用○丙辰諭軍機大臣等前有旨調密雲駐防兵一千名來京聽候調遣此項官兵見已陸續到京本日已明降諭旨派奕經統帶前赴山東會同李德籌辦防堵著該撫體察何處緊要官兵應由何處前進卽迅速知會奕經統帶直赴該處防守可也將此由五百里諭令知之○丁巳諭內閣陸應穀奏捕剿捻匪情形一摺河南永城縣薛家湖地方於二月初五日有大股捻匪竄至經歸德府知府陳介眉督率員弁選帶兵勇馳往兜捕升任開歸陳許道林揚祖派委候補知縣趙獻卿管帶杞縣壯勇協剿該匪等放槍拒敵該府卽將兵勇

分爲三路奮力夾擊斃匪五十餘名生擒一百二十餘名奪獲槍
矛一百餘件餘匪逃遁該升道會同參將范正綸添派文武復追
獲匪黨百餘名二十二日復有擒匪千餘竄入虞城縣大楊集等
處肆掠該撫馳赴歸德咨會護理河北鎮總兵崇安督率將弁添
兵前進林揚祖督同陳介眉等管帶練勇馳往策應該匪等於二
十四日折回商永交界之馬頭寺經該鎮道等督兵追捕並虞城
商邱夏邑鹿邑柘城亳州等州縣暨縣丞劉鴻昌各帶兵勇堵拏
殲斃擒匪二百八十餘名生擒首夥二十六名奪獲大礮二尊槍
刀器械贏頭甚多該匪等因賊氛不靖乘機嘯聚肆行搶掠罪大
惡極經官兵捕拏先後生擒及擊斃共七百餘名當將著名首惡
陳毛等二百四十餘名就地正法以申國憲辦理尙屬妥速所有
在事文武員弁著該撫擇其尤爲奮勇出力者酌量保奏候朕施

恩毋許冒濫該撫仍當嚴飭地方文武實力巡防並隨時飛咨山東安徽江蘇等省一體嚴密兜拏勿畱餘孽○諭前據四川福建等省奏陳緝匪情形並陳金綬等奏遣散廣東各勇沿途騷擾先後降旨諭令該督撫等認真拏辦於訊明後就地正法並飭地方官及團練紳民如遇此等兇徒隨時拏獲格殺勿論見當剿辦逆匪之時各處土匪難保不乘閒糾夥搶劫滋擾若不嚴行懲辦何以安戢閭閻著各直省督撫一體飭屬隨時查訪實力緝拏如有土匪嘯聚成羣肆行搶劫該地方官於捕獲訊明後卽行就地正法以昭炯戒並飭各屬團練紳民合力緝拏格殺勿論俾兇頑皆知歛迹地方日就乂安至尋常盜案仍著照例訊辦毋枉毋縱○諭軍機大臣等有人奏上年冬閒直隸正定府阜平縣屬有土匪多人搶劫傷斃事主之案本年二月閒行唐縣及靈壽縣各屬亦

俱有土匪肆搶拒傷事主重案等語畿輔重地理宜肅清前經降旨查辦安肅等處教匪不知見在如何辦理似此土匪嘯聚恣意橫行若不及早查拏盡數懲辦必致養癰貽患滋蔓難圖近來地方官規避處分諱盜不報該上司彌縫粉飾相習成風釀亂之由實因乎此著訥爾經額迅卽派委員弁前往各該處明查暗訪務將該匪徒悉數擒拏勿使漏網原摺著鈔給閱看將此諭令知之○諭李德奏遵籌團練招募各摺片據稱見辦團練及堅壁清野先行於兗沂曹濟次及濟南東昌泰安臨清等府州至登萊青武四府再與各紳士妥商至揆拏土匪以消內患爲目前急要之務其中驍健之徒必須察看尙有血性可以忠義激發者方准招募畱用等語見解甚好思慮亦遠著卽照所議辦理所需經費准其於正雜銀內先借支十萬兩覈實動用昨已有旨派奕經帶領密

雲兵一千名本日又諭托明阿統帶歸化綏遠等城官兵三千五百名均前往山東會同李德防堵要隘前調山西陝甘兵共七千名亦可次第前赴山東該撫惟當督飭所屬於鄰省交界各處一體嚴防毋任逆匪窺伺並隨時探明淮徐一帶軍情迅速馳奏以慰朕懷將此由五百里諭令知之○潘鐸以病免以駱秉章署湖南巡撫

由署湖北巡撫調

○調徐有壬爲湖南布政使賞史致蕃三品頂

帶爲雲南布政使

由鹽法道遷

○命江甯布政使陳啟邁馳赴徐州總

辦糧臺事務○命綏遠城將軍托明阿統帶歸化城等處官兵前往山東會辦防堵○戊午諭軍機大臣等楊殿邦奏招募壯勇合力進剿一摺據稱挑選精壯水手一千五百名又招募壯勇一千五百名派令前任淮安府知府福林管帶又河標右營遊擊馮景尼率領徐州兵勇及添募壯勇共三千名所募壯勇皆係敢死之

士復諭以大義明立規條頗知感奮接到陳金綬勝保飛咨已統帶大兵駐紮揚州之甘泉山會同攻剿兵勇聞之膽氣倍足等語朕聞見在賊據邵伯鎮以下之灣頭挑築土城分令各賊赴六牘買糧以爲持久之計此時楊殿邦尙在淮安府所派接應之淮陽道曹文昭河標中營副將李輝連逗畱不進馮景尼帶領募勇尙未到齊與楊殿邦所奏情形不符深爲懸念逆匪占踞揚州築城圖米其心叵測恐暗遣奸細探聽前途虛實又圖竄突正當乘其布置未定極力攻剿並斷賊接濟嚴防竄路陳金綬勝保已抵揚州之甘泉山其地是否扼要且在賊後路攻擊若賊北竄楊殿邦等所募壯勇當賊前衝儻不得力則淮安清江勢甚危急稍有疏虞關繫甚鉅陳金綬勝保務須分飭官兵設法繞出賊前與楊殿邦等所派兵勇會剿使賊腹背受敵庶可一鼓殲除楊殿邦楊以

增所派將弁兵勇亦應嚴飭併力夾攻不得但恃援兵致有延誤至吉林黑龍江馬隊官兵卽可就近調撥以資攻剿總以相機扼賊前途毋任北竄爲要劉良駒但明倫見在何處並揚州文武員弁下落卽著查明據實具奏將此由六百里各諭令知之○諭雷以誠晉康奏行抵清江浦訪聞賊陷揚州以後見踞邵伯鎮以下之灣頭挑築土城因賊眾糧少分赴六插買米接濟楊殿邦十數日之久尙在淮安一籌莫展所委應援之淮陽道曹文昭河標中營副將李輝連逗畱不進竟將高郵寶應置之不問所募鄉勇亦不足恃各等語覽奏實深懸念陳金綬勝保已帶兵行抵甘泉山本日已諭令設法繞出賊前遏其北竄又諭令楊以增楊殿邦等各飭兵勇前後夾擊矣雷以誠等巡查河岸是其專責若有逆匪奸細假扮商賈等揀涸迹偷渡必當嚴拏究辦不可稍有疏漏至

防剿事宜軍營及地方官如何辦理雷以誠等若有聞見或探賊情並著隨時據實陳奏將此由六百里諭令知之○諭昨有旨將前調綏遠歸化等城駐防兵共三千五百名令托明阿統帶前往山東會同李德防堵見在賊擾揚州亟應防其北竄慧成馳抵淮徐一帶酌量情形何處緊要卽知會托明阿李德將此項官兵移緩就急以資調遣毋誤事機將此由五百里諭令知之○庚申向榮奏臣疊次督兵誘戰該逆總不接仗臣等再四籌商非以計取不能得手先密飭各營將備挑出奮勇敢戰兵壯以備暗襲賊營之用並令暫緩攻剿以懈其心適連日風雨賊營防備漸疏探得通濟門外賊營稍單先於初六日夜密傳號令分兵兩路一攻鍾山一攻中和橋以分其勢使之不能應援別選精兵從中路直襲通濟門外之營派提督蘇布通阿等領軍進攻開放槍礮該逆伏

營不出李連升帶勇先繞賊營之後途遇防哨數賊立時砍斃伏於山麓秦如虎李若珠帶兵勇由前面進攻楊瑞乾朱占鼇鄭魁士帶兵勇由左山梁進攻虎嵩林明安泰帶兵由右山梁進攻一齊偪近賊營四面疊進該逆因我兵屢次攻勦俱未到此卒不及防被我兵搶至賊牆拋擲火罐噴筒打入營內寮棚帳房一時俱然我兵見賊營火勢已大同聲吶喊搶入營中刀砍矛刺殺斃極多立將賊營三座同時攻破其長髮真賊焚燒殆盡聞有逸出者又爲李連升伏兵擒殺城上之賊見三營已破卽於通濟門內擁出二三千人來救復被官兵直前衝殺該逆勢不能敵不敢戀戰卽時退回通計殺斃賊匪約三百餘人燒斃六七百名斬獻首級一百五十餘顆生擒九十餘名此初七日攻破賊營大獲勝仗之實在情形也見仍籌畫攻復事宜不敢稍懈總須先奪鍾山以據

形勝此外各營便易攻襲 上諭內閣該逆迭陷城池神人共憤

經此大加懲創自不難勢如破竹向榮調度有方深堪嘉尚發去
白玉詩意搬指一箇白玉翎管一支綠玉煙壺一箇著卽祇領又
發去翎管十一支搬指三十六箇荷包一百四十四箇火鏹十三
箇小刀四十九把著向榮擇其奮勇出力之提鎮將弁及兵丁等
傳旨分別給賞前奏所稱都司張國樑首先撲至賊牆被礮打斷
左手中指此時是否傷痊遊擊朱占鼇乳旁亦被槍傷此次復於
左山梁剿匪均屬奮勉出力著一併酌量賞給陣亡兵四名照例
議卹又據奏稱江甯士民深知大義向榮入境所過村鎮莫不簞
食壺漿爭迎恐後並有輸粟來營者謁見向榮莫不流涕感奮各
村逃徙難民陸續復歸故土被脅逃出者甚多均已酌給口糧妥
爲安撫似此人心效順志切同仇急宜協力進攻殄此羣醜該大

臣等必能通籌大局計出萬全迅奏膚功以副朕望也○諭本日據向榮奏大獲勝仗襲破賊營已降旨賞向榮翎管搬指煙壺等件並另發去各賞件令其酌賞軍營出力員弁兵丁矣見在賊匪分竄揚州陳金綬勝保統兵進剿定可大挫賊鋒迅殄羣醜並著發去翎管十二支搬指三十五箇荷包一百四十二箇火鏹十五箇小刀四十九把交琦善陳金綬勝保等祇領如有奮勇出力員弁兵丁著卽傳旨隨時酌量給賞以示激勵○步軍統領衙門奏據江甯駐防前鋒校松柏副前鋒普定步甲吉陞呈訴本年二月初十日將軍祥厚因賊匪攻陷儀鳳門已至內城隨飭令八旗滿洲官兵上城護守八旗婦女或在城上防堵或送飯巡更祥將軍令松柏等趕赴鎮江向楊撫台並文副都統稟明被賊攻陷外城情形懇求代奏因賊兵圍困不能出城旋因賊眾兵少力不能支

是日夜間賊匪攻陷內城祥將軍霍副都統俱被傷陣亡松柏等由牖口出城所有兵丁婦女或被賊人追殺或投河身死均各殉難松柏等到鎮江見楊撫台文副都統面稟祥將軍等陣亡前後情形並懇求歸入京口當差文副都統未經收畱是以來京呈訴等情查江甯省城被賊攻陷將軍都統陣亡伊等前赴鎮江稟見巡撫等不肯收畱因係滿洲駐防無處可奔是以來京呈訴上諭前據向榮琦善先後探報江甯被賊攻陷駐防官兵竭力巷戰殺賊數千人茲閱該前鋒校等所呈賊匪初陷儀鳳門時該將軍等飭令八旗滿洲官兵悉力護守內城卽婦女亦多登城防堵追將軍副都統受傷陣亡內城失陷所有官兵婦女等或奮勇捐軀或臨難自決無一偷生大義凜然洵不愧我滿洲世僕如果守城文武勦力同心皆能似此又何至旬日之間堅城遽破卽著向榮

楊文定許乃釗查明將軍副都統總督提督及省城文武大小各員陣亡殉難情形迅速奏明候旨加恩優卹來京具呈之前鋒校松柏副前鋒普定步甲吉陞卽著暫畱京本旗當差以示體恤○諭軍機大臣等有人奏直隸各屬多有教匪等語據稱安肅縣境內有萬餘天竺教匪景州西南有秘密還鄉教匪滄州小梁山南北趙伙地方有回匪畿輔重地豈容奸宄潛藏前次屢有人奏均經降旨飭拏總未聞有破獲之案豈陳奏之人皆係風聞無據耶著訥爾經額密飭各該州縣偵探確蹤設法掩捕毋得養癰貽患致令匪類橫行儻地方官有彌縫諱飾情弊該督不行參奏經朕別有訪聞惟訥爾經額是問將此諭令知之○諭逆匪竄踞金陵堅拒不出向榮與許乃釗等籌商分兵設伏攻剿賊營官兵人人用命生擒殲斃賊匪甚多辦理甚合機宜軍威大振賊膽已寒該

大臣卽督率帶兵大員激勵將士設法圍攻務將城外賊營悉數燒毀奪據鍾山乘勝克復省垣該逆被創不支勢必豕突狼奔其東南各路既經該大臣派兵扼守常州仍宜嚴密布置不可令該匪乘閒南竄所調上海各兵船計已可抵京口添造船礮共有若干該大臣務須分飭驍勇將弁水陸兩路夾擊先將北固山賊船與雙牖上新河北河口下關等處賊船木簞設計焚燒不得與北岸瓜儀一帶賊匪聯絡卽可肅清江面收復鎮江其東壩一路仍不得以該匪無暇顧及稍涉鬆懈著與楊文定許乃釗嚴飭密防惟該逆狡譎異常難保不聲言將擾蘇常悉索兇徒渡江疾趨邗上幸勢北竄卽其占踞金陵堅守抗拒未必非有意牽掣我師令該大臣不及北顧也○以巡洋不力革福建水師提督鄭高祥任○撥山東司庫銀五十萬兩備本省軍需○改安徽廬州府爲省

城○壬戌周天爵奏

臣於二月二十五日統率遊擊劉玉豹等帶

領兵勇千餘名向定遠之荒僻橋進剿道出懷遠先後斬獲擒首

五十四名三月初二日始到定邑北鑪橋距荒僻橋四十五里探

悉賊匪於朱家灣張橋等處裹脅飢民共有四千餘人沿街焚擄

初四日該匪輦賊而歸賊巢俱在李家岡左家店戴家店三處距

荒僻橋尙在十五六里當札壽州知州金光飭等分三路進攻賊

眾突出迎拒兵勇槍礮齊施殲賊甚眾賊向左家店逃竄忽有伏

賊三百餘人奮迅來援兵勇與之相持

臣

揮令各隊三面齊進殺

賊五六十人將左家店賊巢焚毀燒死之賊無數時已黃昏官軍

卽在戴家岡駐紮初五日夜賊敗奔莊木橋經金光飭督率練勇

生擒陸雙齡陸繼恩等十餘人賊蹤西竄

臣

至莊木橋與金光飭

晤商布置於初九日折回鑪橋探報擒首陸遐齡父子等十餘人

俱在壽州甘羅廟藏匿當派守備信長慶帶兵前往會同金光鈞
及定遠縣知縣郭師泰等合力按捕該逆等轉戰十餘里力竭受
傷悉行就縛當將陸遐齡及其子陸聚奎陸連元凌遲處死其餘
逆目李邦治等十二人一併梟示犯事地方以快人心此次尤爲
出力之知州金光鈞等懇恩分別鼓勵 上諭內閣周天爵剿辦
賊匪斬獲頭目殆盡辦理尙爲妥速著發去白玉搬指一箇大荷
包一對小荷包二箇交周天爵祇領其在事最爲出力之知州金
光鈞著以知府畱於安徽補用並賞帶花翎仍畱壽州辦理團練
事宜守備信長慶著以應升之缺卽行升用並賞換花翎遊擊劉
玉豹著以應升之缺升用千總馬振瀛李際光均著賞加守備銜
武舉劉開甲著以千總卽補以示鼓勵○琦善陳金綬勝保奏查
青揚城南面近江東面濱河且賊營環列難以繞越惟西北兩面

尙通陸路

臣

陳金綬

臣

勝保卽於初九日巳刻移營至帽兒墩

臣

琦善亦於是日移營至雷塘集相距賊營均止數里

臣

陳金綬

臣

勝保督飭直隸山東各營將弁帶領官兵攻打城西賊營因河港紛歧橋梁已斷設法渡河攻擊賊分兩股來迎開礮抗拒我兵奮勇撲殺斃賊三百餘名賊卽敗竄我兵因不得地勢未便窮追

臣

琦善亦於是日巳刻督飭鑾儀使武慶總兵雙來帶領將備官兵

出隊由城北賊營攻打賊匪紛紛迎拒排放槍礮我兵向前衝擊

逼近土城燒毀賊營三座計殺斃賊匪二千餘名初十日卯刻

臣

琦善復督官兵剿殺北路賊匪三百餘名生擒十餘名

臣

陳金綬

勝保復由西路進攻賊營自卯至酉燒毀賊營二座殺斃賊匪

一千數百名餘眾紛紛逃散統計兩日斬獲賊匪幾及四千連用

火箭燒毀賊營五座夜間探悉逆賊潛出附近賊營各村擄人並

據儀徵縣稟報初十十一等日有賊船四五百隻自江甯連橋東下停泊瓜州一帶顯係該逆前往江甯搬取救兵臣等見擬合攻一次俾得及早克復以杜賊北竄之患 上諭琦善陳金綬勝保等統帶重兵初次接仗卽能大挫賊鋒深堪嘉尙琦善著賞還都統銜並發去白玉搬指一箇白漢玉煙壺一箇大荷包一對小荷包二箇交琦善祇領陳金綬著賞還頂帶並發去四喜玉搬指一箇白玉翎管一支大荷包一對交陳金綬祇領又發去四喜玉搬指一箇大荷包一對小荷包一對交勝保祇領前發去賞件並著分賞出力將弁以示獎勵○諭軍機大臣等琦善等奏請派大員隨營辦理糧臺事務等語前將糧臺設立河南信陽地方藩司鄭敦謹駐紮該處總司其事見在琦善陳金綬勝保等均已督兵馳抵淮陽一帶河南糧臺自應移設徐州著陸應穀卽飭該藩司鄭

敦謹馳往該處糧臺總司其事覈實籌辦毋稍延誤又據奏稱應用鉛丸火藥火繩等務屢次飛催未據河南解到該大臣等於初九初十等日督兵進剿斬獲賊匪幾及四千燒毀賊營五座逆鋒大挫正可乘勝殲除鉛丸火藥火繩等物需用最爲緊要著陸應穀嚴飭該委員等星速解赴大營斷勿稍有稽延致干重咎將此由六百里諭令知之○諭周天爵馳奏剿除土匪陸遐齡等各摺片已明降諭旨分別辦理矣勇目劉鴻立孔繼蘭武奉山姜庭槐張鳳山宋鴻占馮金標劉飛熊等膽壯能戰槍不妄發除姜庭槐業已陣亡外餘俱由周天爵賞以六品頂帶該勇目等果能始終奮勇出力報效即可拔補營員以示鼓勵據稱臧紆青人品膽略堪備驅使辦理團練亦有實效著周天爵傳旨令其剿賊立功自必優加獎勵也安徽省失事文武各員仍著會同李嘉端迅卽定

擬具奏奏片一件畱中將此由六百里諭令知之○予江蘇揚州
陣亡遊擊華雲龍世職○癸亥 上御撫辰殿閱侍衛等步射至
己巳越辛未皆如之○以鎮江府城被賊圍困京口副都統文
藝職○甲子琦善陳金綬勝保奏臣琦善移營至離城三里之保
山臣陳金綬臣勝保亦移營至司徒廟距揚州城及臣琦善營盤
均止三里可以相機進剿而賊營自聞大兵前來復由江甯添兵
救應較前愈眾臣等靜守不動選派官兵四出哨探十二日辰刻
賊眾數千擁出北門向臣琦善營盤直撲而來勢甚兇猛臣琦善
親督總兵雙來等迎擊鑾儀使武慶等鈔截其後賊匪見我兵勢
盛復由土城內擁出賊眾接應該鎮將等督率官兵身冒槍礮奮
勇環攻並將銅礮連環施放剿殺一時之久轟殺殲斃之賊甚眾
賊始紛紛敗竄各官兵盡力追剿至鳳皇橋地方賊眾不及投入

土壘落荒奔竄官兵槍礮齊施殲斃千有餘人由橋上落水者不可勝數我兵復回身撲入賊營土城之內痛加剿洗共焚毀賊營三座奪獲旗幟器械槍礮甚多各營賊匪羣出救護木城內大礮連環向官兵施放我兵竭力分剿各賊匪愈殺愈多遊擊白含章中礮陣亡官兵愈憤各執槍礮刀矛直撲上前臣勝保臣陳金綬亦督帶參將鞠殿華等帶領各營官兵並由臣琦善撥來差遣之佐領魁斌等率領火器營弁由西路繞過觀音山會合截殺臣陳金綬臣勝保親督將弁分投追剿賊眾紛紛迎拒蠡擁而至我兵奮勇直驅不避兇猷乘風燒毀賊營二座殺死賊匪不計其數賊匪復由城內擁出數千接應臣琦善復督鎮將與臣陳金綬臣勝保合兵剿擊賊眾均敗入木城時已昏黑當即收隊計自辰至酉連獲五次勝仗焚毀賊營土城五座計殺斃賊匪七八千人內長

髮賊死者甚眾奪獲旗幟器械無算 上諭內閣該逆竄擾江北
擄掠橫行經琦善等親督官兵旬日之間迭獲勝仗實屬可嘉之
至昨已降旨優加賞賚琦善調度有方著再加恩賞帶花翎至該
官兵等如此奮勇朕心甚悅前發去賞件著擇其尤爲出力者分
別頒給並傳旨獎勵指日克復揚郡當渥沛恩施直隸署遊擊白
含章中礮陣亡著照例賜卹陣亡兵丁查明一併議卹該大臣等
務當乘勝攻剿掃蕩妖氛以慰朕望○向榮奏 臣查金陵城外險
要首在鍾山其次則七橋甕兩處賊營互相援應最爲堅固必須
先破七橋甕以分其勢則鍾山與南門外兩花臺等處賊營聲勢
不能聯絡然後左右進攻我兵方可得手 臣與許乃釗等悉心商
度於十一日子時密派提督蘇布通阿總兵馬龍帶領川兵屯兵
川勇捷勇分爲四隊於寅刻暗襲七橋甕賊營先飭總兵和春等

帶領官兵分左右兩路聲言進攻鍾山使彼瞻顧本營不敢輕出
救援蘇布通阿馬龍先於丑刻密遣川勇四百名繞至賊營之後
豫行埋伏又分撥捷勇屯兵從橋左右潛涉過河親督副將虎嵩
林明安泰等帶領四川官兵進至橋頭乘天未明四面齊攻該逆
從睡夢中驚起倉皇罔措黎明後又大霧迷漫對面不能見人我
兵乘勢搶入賊營火罐噴筒一齊拋擲該逆無處躲逃登時燒斃
無數閒有潰圍而出者俱爲兵勇斬獲殆無漏網所有挨近大小
四營無一賊敢於出救臣又親自督兵前往接應我兵愈加奮勇
乘勝分隊前進卽將毗連三座賊營先後攻破臣當令蘇布通阿
馬龍等卽將賊壘趕修進紮七橋壘先據要地再圖攻克鍾山及
雨花臺兩路我兵自丑至午先後攻打已閱六時兵力疲乏卽令
收隊亥刻又密遣捷勇潛赴七橋壘西燒毀賊營一座斃賊無數

計本口燒斃賊匪三百餘名斬取長髮首級五十餘顆生擒四百餘人救出脅從難民一千餘眾臣當將奮勇兵壯尤爲出力者酌加犒賞以示鼓勵一面仍趕緊設法進攻鍾山及雨花臺等處賊營又奏臣接琦善來信知逆匪占踞揚州府城築壘窰濠於城外要地處處設防甚爲周密覈與金陵城外情形大略相同首逆偽東王楊秀青往來金陵揚州之間又聞賊有由浦口六合北竄之說黑龍江官兵六起已到浦口卽令在彼駐紮其六合儀徵俟吉林兵到再爲布置臣聞信之餘正深焦急幸續接琦善信知我兵於初九日大獲勝仗該逆南北被創當不敢復萌北竄之念臣總當埽平賊壘克復省垣保全蘇浙大局不敢稍有鬆懈查逆匪自攻破武昌以前從未分股近因裹脅日眾遂敢肆行分擾其實從前起事逆黨三載以來剿斃已多今又分股心腹愈少至後來脅

從人數雖眾其心不一我兵果能深溝固壘使賊無隙可乘接仗時槍礮近而後發卽足制勝臣年來與該逆大小二百餘戰知之較深曾於安慶途次告知琦善及陳金綬務使兵將共明此意膽氣旣壯卽可轉敗爲功至於水上火攻事宜上游一路臣已於太平糧臺密爲置辦惟慮應翔所帶湖南礮船及臣續調江西大礮均尙未到未敢輕進其下游所調各海口戰船應如何上攻之處總未據楊文定確實咨覆臣恐其猶豫不進坐失事機訪有定海鎮總兵周士法諳悉水師業經調赴鎮江統率師船進剿惟一時難以速到特先派鄭魁士前往江陰督催各船迅赴京口聽候調遣其陸路又續派提督鄧紹夏帶兵一千名與總兵李瑞所帶二千名均在丹陽會齊與舟師密約水陸夾攻務期克復鎮城以爲東南保障又鄧紹夏係江南提督所帶兵力如有不敷本省之兵

尙可隨時調遣臣均已面授機宜酌量辦理上諭該大臣自統師以來倍著奮勇膽氣尤壯實能不負委任深堪嘉尙前頒賞件想已祇領所有提鎮將弁並受傷之都司嚴承恩守備張金燦等均著傳旨獎勵擇其尤爲出力者將前所頒賞件分別賞給陣亡兵丁一名著咨部議卹該逆迭經痛剿勢必窮蹙該大臣等乘勝進攻卽望克復省垣肅清江口與在事文武同膺懋賞也○諭聯順奏請嚴禁流民整飭地方一摺據稱京城街市窮民多有外省口音各城外有用小車推載行李沿途乞食者難免奸宄溷迹並聞中營石窩村見有盤獲湖北民人之案等語見在賊匪竄擾南省難民流離失所經過地方該督撫等自應設法撫綏早爲資遣若任其轉徙無歸人數眾多卽恐有奸徒溷迹其中別生事端畿輔重地尤宜整肅不可不嚴加查察以詰奸慝而恤窮黎嗣後外

省流民一入直隸省交界卽著該督飭令地方官隨時資遣令回
本籍其見在京城內外流民著步軍統領順天府五城一體稽察
妥爲安插或設法遣歸不得互相推諉聽其流徙儻有形迹可疑
之人一經盤獲卽著嚴行究辦毋稍疏縱○諭軍機大臣等據向
榮奏連破賊營大獲勝仗一摺並籌畫攻復鎮江情形等語該大
臣前奏於通濟門外襲剿賊營數日之內復連破賊營四座燒毀
一座將七橋要地暗襲占踞使賊勢不能聯絡卽可攻克鍾山
雨花臺以便收復省垣覽奏欣慰該大臣自統師以來倍著奮勇
膽氣尤壯實能不負委任本日適據琦善等奏於十二日燒毀揚
州賊營五座斃賊七八千人大獲勝仗可望剋期收復揚州是該
逆經南北兩處大兵攻剿必有不及兼顧之勢該大臣務卽乘勝
厲兵痛加勦洗尤須密防城內首要逆匪窮蹙奔突據稱楊秀青

往來金陵揚州之閒又聞賊有由浦口六合北竄之說逆賊鬼蜮伎倆往往避實擣虛向榮深悉賊情務須隨時知照琦善等南北聲息聯爲一氣萬勿墮其奸計所有浦口已到之黑龍江官兵經琦善派令在彼駐紮該處距江甯甚近著該大臣隨時飭知帶兵之員嚴密防堵毋令該逆潛蹤偷渡致誤事機所調湖南礮船江西礮位因何遲久未到卽著飛札嚴催惟該大臣已派鄧紹良李瑞分帶兵丁會齊丹陽進剿鎮江之賊是水路師船刻不可緩本日復諭令楊文定並諭麟桂吳健彰迅帶海口戰船至京口爲夾擊之計楊文定退守江陰恐不免遷延畏葸該大臣卽與許乃釗妥籌知照楊文定卽飭鄭魁士迅速督催各船上駛以應急需定海鎮總兵周士法既據向榮查知熟諳水師卽著飛札催令前赴鎮江會督師船協剿總之江面賊踪必須設法焚剿淨盡使賊南

北隔絕庶可一鼓殲除該大臣相機布置定能出奇制勝江甯鎮江兩城文武下落仍著該大臣等查明迅速具奏將此由六百里諭知向榮許乃釗並諭令彭玉雯知之○諭琦善陳金綬勝保奏痛剿逆匪續經大獲勝仗一摺可嘉之至逆匪竄踞揚州負隅抗拒該大臣等親督官兵進攻屢獲勝仗此次焚毀賊營土城五座殺斃賊匪七八千人長髮賊死者甚眾辦理甚合機宜本日復據向榮奏連破賊營四座燒毀一座並占踞七橋甕地方是兩路剿辦均已得手正宜乘勝痛剿以期迅掃妖氛金陵鎮江各匪已由向榮督兵進攻江北情形自以克復揚州爲最要見在雖大挫兇鋒而賊情鬼蜮難保不窘極思竄仍宜於攻剿之餘防奔竄之路斷不可稍涉大意淮徐一帶雖有楊殿邦等分路設防而兵力單弱且自淮而北一路平坦無險可扼儻賊匪被剿窮蹙大隊北竄

淮徐猝不及防其蔓延更爲可慮著該大臣等悉心妥籌總期防
剿兼施勿令賊匪乘閒北竄本日復諭令楊殿邦楊以增等督兵
嚴防仍著隨時知照相機剿辦浦口六合一帶要隘見在如何扼
守馬隊官兵計已陸續到齊務須擇要布置遏賊竄路不可因屢
次獲勝稍有疏忽將此由六百里諭令知之○諭前經降旨令奕
興挑選盛京官兵四千名來京聽候調遣朕思盛京爲根本重地
續設水師兵數一萬九千餘名除調撥外其在營兵丁或應巡查
邊門或應分防海口在在均關緊要著奕興認真查驗如有老弱
充數及缺額不足等弊隨時嚴行整頓勤加訓練務令技藝嫻熟
悉成勁旅以固根本而資操防將此由四百里諭令知之○諭聯
順奏 天壇齋宿一切執事人員俱應敬謹將事請查照舊章添
派官兵以昭敬慎等語 天壇重地理宜嚴密稽查著自本年四

月起凡遇詣

壇齋宿日期該營王大臣等於舊設守衛齋宮官

兵一百名外仍按兩營輪班次數添派官兵一百名於壇外值

宿所有新添舊設官兵均飭令各帶火器實力巡查毋稍疏懈將

此諭令知之○賞故廓爾喀貢使噶箕更別熱慶銀三百兩達他

人巴達拉興噶羅恰第熱銀各二百兩○乙丑諭內閣大學士軍

機大臣會同刑部定擬徐廣縉罪名一摺已革署湖廣總督徐廣

縉經朕簡派欽差大臣接辦軍務沿途行走已屬遲延迨賊由湖

南下竄漢陽武昌相機失守猶復株守岳州一籌莫展實屬調度

失機徐廣縉著卽照裕誠等所擬按律定爲斬監候秋後處決○

諭前因調派各路官兵前往剿賊恐其沿途需索擾害閭閻迭經

降旨諭令統兵大員及沿途各督撫嚴行查察並將查出滋事官

兵分別懲辦見在續調各路官兵次第啟程朕思軍行首重紀律

必須嚴明約束方可安靜進行該兵丁等儻仍有向地方官任意
婪索甚或擾累民間者著統領大員卽將犯法之人按軍法從事
並將帶兵之員嚴行懲辦勿稍寬貸至所過州縣應付一切差務
自應按照定例妥爲豫備如有辦理不善及任聽辦差人役剋扣
侵漁以致兵丁藉口逗留別滋事端該督撫卽行指名嚴參以靖
地方而肅軍律將此通諭知之○諭軍機大臣等李德奏江南兵
力足資防剿請飭續調各路官兵暫緩前進免致沿途騷擾一摺
所奏不爲無見逆匪竄踞金陵分擾鎮江見經向榮督兵將賊營
連次燒毀痛加剿洗揚州賊匪亦經琦善陳金綬勝保等帶兵進
剿斬獲甚多逆鋒大挫惟三城尙未克復賊勢奔突南北靡定山
東與江南接壤地方防剿最關緊要而畿輔重地亦不能不豫爲
設防迭經王大臣會議具奏朕所以特調各路重兵前往山東及

江南淮徐等處以備攻剿且可彈壓地方鎮靜人心俾吾民有所
憑恃不致驚惶遷徙非不知帑項難籌兵差難辦實出於萬不得
已之苦心也見在軍務方殷所調各兵均已啟程未便中止惟有
嚴飭統兵大員及地方官認真查察申明紀律以肅戎行惟冀
上天眷佑迅殄妖氛逆賊早滅一日吾民卽早安一日卽徵調之
兵亦可剋期凱旋歸伍此朕所日夜禱祀而求者想該撫定能仰
喻朕意也將此由四百里諭令知之○丙寅向榮奏官兵奪據七
橋甕前後四營並燒毀一營後我兵卽就所奪之處分紮四營將
鍾山及報恩寺賊營隔斷該逆前後不能兼顧所有報恩寺三營
於十二日夜閒逃徙一空臣等於十三日復飭各提鎮分五路進
攻以四路趨其別壘以一路大兵直擣鍾山先於明孝陵衛街豫
伏疑兵各兵勇均於已初出隊一齊直撲賊營逆營大礮極多我

兵於槍礮叢中奮力攻打各持稻草一束蔽身兼爲填濠燒營之用一路轉戰緊逼賊營拋擲火毬火罐賊營驚慌欲遁城上賊眾見各營力不能支於對面朝陽門衝出一隊約三千餘蠡擁而來並有騎馬賊目在門外指揮督戰我兵遂以一半攻營一半回擊賊目呐喊直前該逆不敢抗敵卽時回遁兵勇追上砍殺無數斬取長髮首級七十餘顆追至朝陽門外該賊目隨卽閉門城上礮石雨下未能搶進臣以接戰過久收兵暫息卽傳令將挑出奮勇兵壯多備火具於是夜四鼓乘月襲燒賊營三更後忽見鍾山前後五營一齊火起明孝陵饗殿亦然卽催隊直至鍾山旋見南門雨花臺各賊營同時火光燭天當卽擒獲賊匪數十名知鍾山各營之賊自知萬不能守連夜自行焚毀於朝陽正陽通濟各城門外將舊營加高培厚爲退守計此十三日接仗後賊匪燒營退守

之大略情形也

臣

見探查南門以西漸與水路相近擬卽進兵截

擊夾江賊船惟是夾江紆折火攻船隻斷不能到隨飛調新抵太平之滇黔官兵一千二百名及守護糧臺之陝西官兵一千二百名迅速馳赴板橋一帶步步爲營進紮雨花臺既可遏賊南竄東壩及回竄太平之路兼可偏近夾江水次一面再由大營撥兵前往城南迤西紮營兩路官兵聲勢聯絡更與上游火攻礮船相近可以互爲聲援惟鍾山雖得而距賊甚近城上及朝陽門口賊營礮子均能打及一時不便紮營刻下賊已退守城門不敢輕出須用計取擬與城門脅從之眾潛通消息再行動手方能有濟水上燒船之事亦已次第辦理一俟大礮解到天氣乾燥卽可相機行事又奏江上賊船非火攻不能制勝惟是該逆防守極嚴必須先將江中形勢及賊踪停泊所在一一查探明確方能下手

臣

查該

逆小船皆聚夾江口內已用浮橋斷路復於江中沙洲安營設礮以護浮橋於南岸近船之處環以木城連營固守夾江口外厚集木簞通連兩岸橫截大江防我西面下擊是上游欲用火攻非先破大木簞潛渡沙洲從陸路拋擲火罐火甌不可其下游大隊賊船全在浦口以便南來復於下游厚集木簞通連兩岸橫截大江防我東面上擊是下游欲用火攻非火船礮船從京口乘風上溯不可所有上游應備火攻船隻及水摸人等已於蕪湖當塗密爲豫備惟是火船之後必須繼以礮船方能得力除湖廣先到礮船九隻外已令臣子向繼雄添造六隻惜大礮不敷配合江西續調之礮亦尙未到已將大營新獲賊礮重五六百斤者陸續解赴當塗應用盧應翔管帶湖南礮船十四隻礮勇四百名甫於三月初十日駛抵當塗卽令與向繼雄同候調遣至下游賊船必得署督

臣楊文定趕緊設法將所雇各船東路駛上方能兩面夾擊該署督此時仍在江陰以等待海上各船爲名江南輿論沸騰臣奪鍾山原爲俯擊金陵遠控鎮江起見惟省城爲賊所踞沿江水路近處皆不能通太平已隔一百四十里鎮江江陰尤爲遠莫能及火攻之事處處不能應手此時金陵南門以外有路可通水次卽當趕緊設法辦理上諭內閣向榮自到金陵疊次勦捕逆匪運籌制勝悉合機宜著賞穿黃馬褂並頒給祇領以示嘉獎該大臣卽與該署撫許乃釗悉心籌畫乘勝攻勦克復省城在事出力各員定當同膺懋賞勉之望之其陣亡兵丁查明請卹○諭軍機大臣等向榮奏續獲勝仗奪回鍾山及籌辦江面賊船各摺片並繪圖貼說披覽頗慰朕懷鍾山爲金陵形勝之地我兵分路進攻直逼賊營各營賊匪驚惶連夜自行燒毀各營將舊營加高培厚爲退

守計足見賊勢已蹙賊膽已寒惟城外賊營尙多鍾山距城甚近
可以俯瞰城中最爲要地見雖奪獲而一時未便紮營不可稍涉
大意復令該逆竄踞至江面賊船自以火攻爲要所有上游應備
船隻及水摸人等該大臣業已密爲豫備並令向繼雄及盧應翔
管帶礮船駛抵當塗聽候調遣其下游應用船隻已有旨令楊文
定設法籌辦並疊諭麟桂吳健彰由上海雇火輪船及師船由海
入江該大臣已派鄭魁士前往楊文定處迎提戰船惟楊文定久
駐江陰毫無展布其畏怯情形已可概見恐不足恃許乃釗見署
巡撫責無旁貸此時麟桂等所覓上海各船如已趕到著卽與麟
桂密商約定上下游同時夾擊務將江面賊船焚毀淨盡斷其南
北往來之路則賊勢自可坐困而鎮江一城可先克復惟見在大
隊賊船全在浦口江甯城內外賊匪被剿窮蹙難保不由浦口渡

江北竄本日已諭令琦善等隨時防範該大臣等仍當一面督兵進剿力圖收復仍一面偵探賊情如有渡江北竄之信卽行派委得力將弁設法截擊並飛咨琦善等趕緊堵禦萬不可稍有疏虞將此由六百里諭知向榮許乃釗並傳諭彭玉雯知之○諭前有旨令奕經統帶密雲官兵一千名前往江南山東交界地方防堵疊據琦善向榮等奏報續獲勝仗難保不窮蹙他竄著奕經迅帶所調密雲官兵前赴王家營駐紮與清江浦防剿之兵互相策應仍當隨時察看何路緊要卽往何路扼守並與慧成李德知照辦理毋誤事機將此諭令知之○諭前有旨令托明阿統帶歸化綏遠等城勁兵前往江南山東交界地方防堵疊據琦善向榮等馳奏續獲勝仗難保賊匪不窮蹙他竄著托明阿督帶所調官兵三千五百名前赴清江浦駐紮與楊以增協力防剿仍當隨時查看

何路緊要卽往何路扼守並與慧成李德知照辦理毋誤事機將此由五百里諭令知之○撥山海關稅銀一萬五千兩備駐防官兵俸餉○丁卯諭內閣朕以軍興三載需餉浩繁特命大學士裕誠等並尙書柏葰翁心存會同戶部妥速議奏本日陳奏各條均屬妥協已議行矣並據奏請推廣恩綸申勸捐輸以裕軍餉披覽之下有不能不宣示朕懷者國家定制歲入有常惟正之供不容短絀此外一絲一粟皆吾民勤動所餘苟非軍國要需何忍重勞百姓比年以年各省奏報紳士商民輸將踴躍除隨時獎敘外並將捐輸較多之山西陝西四川等省酌廣鄉試中額並生員學額以昭激勸見在大江南北軍營援剿之兵數逾十萬連日捷音疊奏大挫兇鋒近復調集各路重兵剋期赴剿合之前調之兵不下二十餘萬朕不惜帑金爲民除害統計所撥已及二千七百餘萬

兩際茲大兵雲集需餉尤殷仍不能不借資民力以濟軍儲朕每覽軍營奏報小民於流離失所之餘尙復輸粟犒師深爲悲憫卽各省距賊較遠地方亦復因軍興徵調供億維艱若再諭令捐輸實非朕心所願惟念賊匪一日不滅民生一日不安雖疆圉遠近攸分而民情驚擾則一恤鄰有福古訓昭垂朕之命將出師原不僅爲東南數省生靈拯災雪憤但得櫓槍迅掃海寓乂安薄賦輕徭與民休息昇平之福朕與天下共之凡爾士民諒能共喻著照大學士等所請由各省督撫妥爲勸導無論已捐未捐省分凡紳士商民捐貲備餉一省至十萬兩者准廣該省文武鄉試中額各一名一廳州縣捐至二千兩者准廣該處文武試學額各一名如應廣之額浮於原額卽遞行推展儘捐數較多展至數次猶有盈餘者准其於奏請時聲明分別酌加永遠定額加額銀數及如何

歸併劃除之處悉照大學士等所議辦理其捐生本身應得獎敘仍准奏請另予恩施如有一人一家捐貲累萬及毀家紓難接濟糧臺者破格殊恩不在此列此次捐輸乃朕不得已之苦衷儻有墨吏奸胥藉端擾累苛派侵吞以朝廷不忍違行之政爲若輩取攜自便之資病國虐民情尤可惡著該督撫立即嚴參置之重典切勿稍存姑息致累民生各路統兵大臣亦當念軍士餉糈所出皆吾民竭力輸將嚴飭所帶官兵迅速奏功以蘇民困軍中疲弱兵丁必當隨時裁汰使兵歸實用餉不虛糜糧臺大員收支銷算亦當力求撙節不可稍事冒濫庶上可以報國卽下可以對民各該督撫等卽將此旨刊刻謄黃徧行曉諭俾薄海臣民咸知朕意該部卽遵諭行○諭倪良燿奏海運剝送交兌米數參差一摺並申辯家屬回籍等語此次江浙兩省海運米石迭經降旨責成倪

良燿趕緊辦理如果該司認真督催何至二月中旬始行奏請勒
限放洋嗣後亦未據將遲延州縣指名參奏茲因被黃宗漢參劾
特臚陳剝運交兌情形曉曉辯論以掩其遲誤之咎已屬難逃朕
鑒況當軍務倥偬之際輒將眷屬遷避鄰省致令民心惶惑咎實
難辭乃猶以繞道回籍探訪老母爲詞何居心若是巧詐著傳旨
嚴行申飭責令將江浙兩省未經放洋各米石迅速督飭跟解開
放如再事遲滯有誤天庾正供朕必將該藩司從重治罪至近來
該兵省分每聞督撫司道先將家屬移徙出城甚至賊尙未到之
處亦有先遣家屬遠避者以致訛言肆起士民驚駭遷徙紛紛似
此張皇失措止知自顧身家安望其固結人心保守疆宇耶朕於
中外臣工無不推誠相待爾諸臣亦當清夜捫心公忠自矢恪守
國爾忘家之義毋負朕望勉之懍之將此通諭知之○諭軍機大

臣等前以山東省與江南接壤迭經降旨令扼要設防並據李德節次將布置情形先後陳奏茲據給事中毛鴻賓奏黃河渡口船隻見雖停泊北岸猶慮其縛木爲筏或勾結奸民暗偷船隻爲之接應宜於黃河兩岸以重兵扼守使賊不得北渡請飭周天爵統帶兵勇迅赴淮徐一帶與楊殿邦楊以增等互爲聲援並請撤回調往安徽兵六千餘名由李德分營防堵鄭城穆陵關更爲扼要宜認真設防等語著李德按照片內所陳悉心體察如有可採卽妥籌辦理見在督辦團練五品頂帶前任漕運總督李湘棻告病在籍前任臺灣鎮總兵呂恆安並著該撫察看如幫辦河防可期得力卽奏調赴防所可也原片件著鈔給閱看將此由四百里諭令知之○陝甘總督舒興阿奏陝省撤防仍駐西安得旨該督仍應移駐西安以資鎮守俟大軍凱撤後再回蘭州○戊辰諭內閣

張亮基崇綸奏剿辦通城等屬土匪迭獲勝仗並添兵速剿一摺
湖北通城縣土匪滋事嘉魚縣地方復有匪徒劫獄焚署戕害書
役之案經署該督等派委臬司江忠源督同都司戴文蘭守備馬
良勳分道往剿該匪等糾約夥黨欲爲負隅抗拒之計業經士民
等將通城縣首要匪犯方九成葛柏相夏繼綱劉其闢等拏獲就
地正法惟首逆劉立簡竄至麥園土匪羅經仁家與何葛墩地方
首匪何天進糾約死黨潛相勾結該臬司乘夜馳往出其不意奮
勇剿殺立將首逆劉立簡擒獲並獲從犯多名燒毀賊巢羅經仁
等翻山竄逸官兵追至葛家坪與賊鏖戰殺斃二百數十名生擒
十餘名次日賊復分路設伏來撲營盤把總滕家盛蔣大勝倪長
智六品軍功林志祺伍坤德鈔出營後竭力追殺斃賊匪眾三日
之內共斃賊四百餘名正擬拔營前進復聞崇陽縣有逆匪陳九

斗汪姓等聚眾焚劫該臬司卽稟商該署督調六品頂帶江忠濟教諭劉長佑所帶楚勇並鄖陽鎮守備石清吉所帶防守官兵馳赴軍營會同都司戴文蘭進剿此股匪徒梟獍造孽輒敢煽眾滋事勾結焚掠亟應迅速撲滅以淨根株臬司江忠源前經降旨令其馳赴向榮軍營覓在剿辦湖北匪徒著暫緩啟程卽行督帶兵勇趕緊籌辦務將著名逆首悉數殲擒毋任一名漏網以靖地方

○諭張亮基崇綸奏查明湖北失事文武員弁一摺並開單呈覽前因已革湖北提督博勒恭武自岳州潰逃後猶復展轉偷生降旨令張亮基等提解到省卽行正法茲據奏稱訪查該革員復赴江南就醫改道由河南南陽府地方行走並有屬令伊子探聽消息緊急卽報病故之語種種狡詐實出情理之外著江西江蘇安徽河南直隸各督撫一體迅速查拏無論該革員行抵何處拏獲

後一面奏聞一面就地正法伊子刑部員外郎貴山見由湖北回京並著直隸總督正白旗滿洲都統查明拏交刑部嚴訊確情以憑查辦其未經查出各員仍著張亮基等確查隨時具奏○己巳諭內閣戶部奏請將擅行截留海運漕糧之巡撫藩司交部嚴議等語本年江甯所屬及安徽江西應運新漕因河道梗塞未能運京酌量截留軍食原係變通辦理並非准其截留海運米石乃該撫等並未豫先分晰奏明請旨輒援截留漕糧抵餉諭旨率將海運正糧截留二十餘萬石之多實屬有意蒙混楊文定聯英倪良燿均著先行交部嚴加議處仍著該署督等迅將所截米石按照奏定章程設法補足全數剋期裝兌沙船運京毋得再有遲誤致干重咎○諭兵部奏盛京官兵據報啟程請旨遵辦一摺所有前經飭調之盛京官兵將次來京卽著署金州副都統杭州將軍瑞

昌統帶前赴淮徐一帶會同慧成辦理防剿其吉林官兵著恩華統帶前赴直隸會同訥爾經額擇要駐紮以備調遣仍飭沿途地方官妥速豫備毋稍遲誤○諭軍機大臣等御史王茂蔭奏近日京城銀錢帳局立意收本不肯借貸以致各項店鋪歇業居多又典鋪多不收當商賈流通方足以安民業著步軍統領順天府五城剴切曉諭凡挾貲經運之人均各照常出納毋得故意刁難致使貧民失業至開設典鋪原以便民應如何設法開導令其照常交易之處妥籌辦理將此諭令知之○辛未諭內閣琦善等奏查訪揚州失守文武員弁下落一摺前因逆匪東竄揚州防堵最爲喫要特令漕運總督楊殿邦督同前往兩淮鹽運司但明倫兩淮鹽運使劉良駒辦理防堵乃賊匪竄入揚城楊殿邦輒先期退至上游但明倫劉良駒及揚州府知府張廷瑞等至今杳無下落實

屬罪無可追楊殿邦但明倫劉良駒張廷瑞並甘泉縣知縣梁園
棟均著革職交刑部分別定擬罪名具奏楊殿邦仍著畱於清江
浦隨同楊以增辦理防堵帶罪自效其江都縣知縣著該部查明
一併革職交刑部治罪○諭前有旨令琦善大營糧臺改設徐州
並派河南藩司鄭敦謹馳往該處總司其事茲據陸應穀奏稱已
飭鄭敦謹前往辦理惟徐州係屬隔省恐河南糧臺委員人地生
疏呼應不靈等語著楊以增添派道府大員駐紮徐州會同籌辦
以臻妥協而免延誤○諭軍機大臣等前據向榮奏攻剿江甯賊
匪連獲勝仗並請飭調水師戰船以備火攻已諭令楊文定速帶
艇船進剿並傳諭麟桂吳健彰雇備上海船隻迅駛江口矣見當
剿賊喫緊之時大江南北兩岸雖屢獲勝仗而賊船橫梗江面毫
無顧忌儻各路船隻不能及時攻剿任令該匪連檣游奕南北自

如逆賊何時始就殄滅耶該大臣前派鄭魁士往江陰迎提船隻
未知能否得力仍著另派大員迅往下游催提麟桂等所覓各船
如有入江確信著向榮許乃釗密商布置其上游船礮應於何處
會齊同時夾擊務將江面賊船焚毀淨盡迅掃妖氛若先能攻獲
賊船輜重不但收其軍械並可因糧於賊以備賞犒將此由六百
里各諭令知之○諭昨據慧成奏行抵商邱趕卽飭赴淮徐剿辦
賊匪當有旨令常清蘇勒芳阿帶兵隨往聽候調撥矣茲據琦善
等奏籌定防剿情形揚城西北兩路均已紮立營盤賊匪不敢繞
越惟東面一路可由灣頭鎮至仙女鎮抵邵伯上赴淮安清江經
該大臣札調河標遊擊馮景尼帶領兵勇三千在灣頭鎮安營堵
截並飭前任淮安府知府福楸帶領壯勇三千於附近灣頭上方
寺紮營爲後路援應惟馮景尼所帶兵勇究恐單薄該逆被剿窮

蹙鋌而走險勢所必至灣頭爲東北要隘必須重兵防守方能遏其北竄此時慧成計已馳抵淮徐一帶著卽統帶官兵督率馮景尼福林等擇要防剿與琦善陳金綬勝保軍營互爲聲援合力進攻儻該逆勢窮奔突卽分路截擊以遏兇鋒奕經托明阿等所帶密雲歸化綏遠官兵並陝甘調撥官兵陸續趕到並著慧成酌量調遣總期揚州及早克復江北肅清則金陵剿辦更易得手慧成經朕特簡諒必能相機應變以副委任也將此由六百里諭令知之○諭孫瑞珍奏據前任廣東按察使趙長齡呈遞說帖稱該員前在肇慶府任內曾雇用紅單商船剿平廉州洋匪著有成效該商船素以販油爲業涉厯大洋其駕駛之快利礮火之精銳點放之嫻熟較之額設師船得力不啻數倍南粵鎮標遊擊黃開廣係水勇出身與該船戶等素相聯絡若使之雇募管領駕赴江南攻

剿可期制勝等語見在逆匪竄至江甯揚州鎮江等府疊經琦善向榮馳奏屢獲勝仗大挫兇鋒惟賊踪蟻聚江干非有得力舟師不能制勝前飭調之廣東外海師船既據該督等奏稱笨重難行能否駛入長江尙難豫定見當江面攻剿喫緊之際著葉名琛柏貴迅卽將此項紅單船隻酌定數目趕緊募雇配帶礮位鉛丸火藥卽派遊擊黃開廣管領星速由海入江聽候欽差大臣向榮等調遣以資攻擊如黃開廣距省尙遠調到需時卽著該督等另派熟習情形員弁管帶前進飭令該遊擊隨後駛赴江南協同駕駛總期速益加速勿誤事機原摺鈔給閱看將此由六百里諭令知之○琦善陳金綬勝保奏自三月十四日陰雨連綿至十九日尙未晴霽平地水深尺許該逆深溝高壘負固不出我兵仰攻殊難得力臣等焦灼實深查瓜州在揚城之南淮安在揚城東北臣等

在西北兩面迎擊正所以杜其北竄見在揚州赴淮一帶運河水勢僅存尺許不惟重載難行卽小船亦俱淺閣是水路賊船不能竄至淮安又據泰州知州張之杲稟稱三月初七等日均有賊匪至該州交界仙女鎮等處搶擄該州團勇分起殲斃賊匪五十餘名自大兵到後並未滋擾地方尙屬安謐等情查該州壤接揚州旣無被擾其以下之泰興等處不問可知陸路道途紛歧揚城西北兩路可以上竄者臣等均已紮立營盤賊匪不敢繞越惟東面一路可由灣頭仙女邵伯等鎮上赴淮安清江其由西北至東門橋梁早被賊匪折毀均於要隘紮立賊營此時我兵無從繞越若徑往攻打又恐該逆乘閒由西北竄出是以札調遊擊馮景尼帶領兵勇在灣頭鎮安營堵截並飭知府福林帶領徐州壯勇二千名在附近灣頭上方寺紮營爲馮景尼後路援應至六合縣之甘

泉山陳家集兩處地方臣等已將飭調來營之山東兗曹二鎮官兵一千名分派駐紮以截其上竄之路惟儀徵縣止有團練鄉勇防守俟前調陝甘兵一千七百餘名到時再行籌撥防堵查見踞揚城賊匪自初九日經臣等攻其不備又經連日合兵痛剿其鋒已挫該逆惟恃土壘木城於揚城內外分股屯聚東西北三面要隘處處堵截亦不敢乘閒逃竄擬察看情形一二日內卽督兵分路直搗賊巢力圖克復上諭該大臣等見在西北兩面迎擊該逆不能分竄潛匿不出計賊匪攻陷揚城已逾一月前雖節經該大臣等復有勝仗而該逆臣等抗拒以老我師是其慣技惟當用計誘令出巢我兵方可併力圍攻該逆在城抗拒何處較爲疏懈其城外之土壘木城應如何攻破如何設法縱火焚毀使逆賊失所憑依郡城自可剋期克復該大臣等務當合力進攻互爲聲援

斷不可令賊匪乘閒北竄查文經已令護理漕督即可令其統帶楊殿邦之兵勇督同馮景尼等辦理防剿所有河南應行解運餉械業據陸應穀奏報均經趕運前進計此時已可全數到營陝甘官兵卽著該大臣嚴催撥往儀徵防堵本日又據雷以誠等奏大兵與賊相持正宜先其所急若該逆於揚州戰敗後或避甘泉山大軍徑趨高寶犯及清淮或於江甯戰敗後由廬滁定遠鳳陽直抵徐州西可以向河洛北可以走山東等語琦善等一面攻剿揚州賊匪仍隨時知照向榮旣不可使該逆竄出後渡江而南與金陵賊匪會合尤須刻刻防其北竄設有疏虞所關非細諒該大臣等必能籌畫萬全迅奏膚功也將此由六百里各諭令知之○諭前據訥爾經額奏遵查天主教卽係天主教直隸民人諷經習教者不獨安肅一縣已諭令該督嚴行查辦茲又有人奏安肅安家

莊地方傳習天主教者不下數百戶男婦成羣學習拳棒武藝前七八年間曾經該縣營查拏該匪竟敢拒捕將武弁捆縛見今黨徒愈眾且有屯聚米石收買鐵器火藥等語如果屬實是畿輔重地竟令奸宄潛藏不法已極著訥爾經額密派幹員偵探確蹤設法按捕協力緝拏訊明按律治罪儻該地方官有諱飾情弊卽著嚴參將此諭令知之○以福濟爲漕運總督未到任前以江蘇按察使查文經暫行護理以長臻署河東河道總督

由奉天府府尹署

○王

申諭軍機大臣等朕聞四川等省向產有金銀礦自雍正以後百餘年來未嘗開採地脈休養日久所產自必暢旺上年大學士等會議籌備軍餉章程內請開採以裕軍需已依議行矣道光二十八年王大臣會議開礦一條會通行各省督撫履勘查辦間有一二省分奏請開採旋復藉口於硃老苗稀輒請停止或以聚眾生

事爲詞畏難苟安因循不辦朕思開採礦廠以天地自然之利還之天下較之一切權宜弊政尙屬無傷體制有裨民生惟在地方官經理得宜自不致別滋流弊卽如見在各省舊有礦廠按年開採抽課官民日久相安豈非明驗當此軍餉浩繁左藏支絀各省督撫務宜權衡緩急於礦苗豐旺之區督派幹員悉心履勘各就地方情形奏明試辦毋得狃於積習任聽不肖官吏名爲封禁暗取陋規但以有礙風水聚眾滋事等語一奏塞責將此各諭令知之○癸酉琦善陳金綬勝保奏二十二日分路進攻賊營臣琦善派總兵雙來帶領官兵攻其中盤儀使武慶副將松齡等攻其北派遊擊英貴等帶兵接應又令侍衛伊興額等管帶綠營馬隊分兩翼從旁鈔截一面知會陳金綬勝保一同督兵攻剿雙來帶兵先到城北遇有河渠卽令軍士用袋土立時填墊一擁而過直擣

賊巢槍礮齊施突向北門攻打該逆果不料官兵乘霧驟至倉卒迎拒不敢出巢僅在木城內暗放連環大礮形同驟雨我兵不避兇燄奮力進剿忽有手執黃旗賊首擁出卽被我兵用銅礮轟斃賊眾仍復奔回潛匿不出我兵因從下仰攻驟難得手暫退數武故示以隙該逆果率眾搶出我兵見賊離巢當卽大聲喊殺擊斃無數並將騎馬賊首立時轟斃搶獲礮械多件賊復退回土壘木城藏匿臣陳金綬督帶直隸官兵進攻廿四橋賊營先於沿路土坡及林深草茂處所分兵設伏選派官兵上前誘敵賊營開放大礮我兵佯敗該逆追趕我兵猛起擒殺賊匪百餘名該匪立卽退敗臣勝保督帶壯勇由觀音山進攻法海寺賊營分兩路撲剿該逆望見我兵卽開礮迎敵我兵避開礮路奮勇直前轟斃賊匪數十人賊眾在牆內搖旗吶喊匿不出戰統計三面分攻自寅至酉

傷斃賊匪四百餘名擊斃黃衣大頭目三名揚城內外之賊經

臣

等督兵痛剿見在不敢離巢但賊匪環城築壘層層遮護我兵不

能繞越其後僅從對面剿擊

臣

等行營又無大礮目睹情形萬分

焦灼再四熟商凡破壘攻城之利器全恃大礮當先

臣

琦善知直

隸督

臣

訥爾經額鑄有大礮已飛咨督

臣

趕緊派員押送前來以

備攻賊營壘上諭內閣該匪盤踞揚州經兵勇屢次痛剿不敢

離巢肆竄該大臣等務卽乘勝督飭帶兵各員等相機進剿克復

郡城仍一面嚴密堵截無任窮蹙他竄○諭軍機大臣等前據張

亮基等奏已革提督博勒恭武自岳州逃後復赴江南就醫並令

伊子刑部員外郎貴山潛聽消息當經降旨令江西等省各督撫

查拏博勒恭武一面奏明一面卽行就地正法並令直隸總督正

白旗都統將貴山拏交刑部審辦茲據薩迎阿奏稱據該旗佐領

等呈報貴山於上年十月告假省親至今尙未到家並稱博勒恭
武次子貴德見任湖南興甯縣知縣難保不詭稱就醫潛匿任所
等語著駱秉章派委幹員馳赴興甯縣密查如博勒恭武潛匿伊
子貴德任所該撫卽行拏獲遵照前旨一面奏明一面將博勒恭
武就地正法將此諭令知之○諭昨有旨令廣東雇覓紅單船隻
由海入江爲助剿賊船之用茲又有人奏請飭廣東雇覓火輪船
隻由海道馳赴江南協剿並稱候補道伍崇曜可以商酌雇覓等
語逆匪竄踞金陵疊經向榮攻剿奪回鍾山分擾揚州之賊亦經
琦善等屢次殲擒逆鋒大挫水路匪黨尙未痛加剿洗前已飭令
上海道吳健彰雇備船礮恐不敷用朕亦知伍崇曜素悉海洋情
形屢次出力著葉名琛柏貴卽密傳該員與之商酌應如何雇覓
船礮可期得力其船價一切經費如何籌畫總須迅速辦理方能

有濟伍崇曜如果出力辦成此事俾江面賊船立就殄滅其功甚偉朕必當破格施恩以昭獎勵儻墊款過鉅軍務告蒞亦不難如數實還也原摺鈔給閱看仍宜慎密將此由六百里諭令知之○諭前據李德奏請於山東藩運兩庫內動支銀五十萬兩以備軍需當經降旨允准見在續調各路勁兵俱令前往淮揚一帶防剿需餉甚殷恐部撥帑項一時未能趕到著李德於前項五十萬兩內撥銀三十萬兩星速委員解往徐州糧臺知會琦善慧成軍營及管理糧臺之司道大員酌量緩急分別覈實支用以濟急需鄭敦謹陳啟邁見在是否行抵糧臺並著李德行知查照辦理俟部撥銀兩路過山東該撫如須畱抵前款著奏明酌畱可也將此由六百里諭令知之○諭戶部議覆奕興奏請將內河船隻准在鐵嶺以北行運一摺盛京重地防範宜嚴是以前議行船界址近省

以渾河渡口爲斷再西以巨流河口爲斷河運船隻不准越界北駛見當籌備京倉採買糧石著該將軍卽飭地方各官諭令內河船隻准於鐵嶺以北可通河運地方販運米石卽照戶部所奏無論何項雜糧不計石數多寡酌量採買分別運津運通以期接濟京倉務卽妥議章程迅速具奏至岫巖鳳皇城等處仍責成旗民地方官嚴行稽查不准船隻偷越以重邊禁將此諭令知之○甲戌諭內閣前據倪良燿奏江蘇布政使聯英猝患風痰懇請開缺當降旨准其回籍調理茲據楊文定奏聯英於未奉諭旨之先藉病潛逃請旨稽查等語見在聯英曾否回京著吏部及鑲黃旗滿洲都統查明據實具奏倪良燿不俟該撫批飭遽行奏請開缺殊屬冒昧著交部議處○諭楊文定奏請將擅棄職守之遊擊熙昌奎喜懲辦一摺又據向榮奏參該遊擊等畏賊潛逃等語江蘇常

州營遊擊熙昌泰昌營遊擊奎喜均有守土之責輒敢擅棄職守畏賊先逃喪心無恥殊堪痛恨若不立置重典何以肅軍律而儆效尤奎喜業經楊以增奏參降旨革職拏問熙昌著一併革職拏問均著解交向榮軍營卽行正法以昭炯戒○諭楊文定奏請將任意遷徙畏葸無能之道員革職示懲等語江蘇署常鎮通海道胡調元經該署督飭令管理鎮江籌防局事務該員於鎮江失守後擅自退至常州復繞至通州任意遷徙竟置陸路水師錢糧於不問該員失守城池本有應得之罪著卽革職拏問交該署督查訊確情按律定擬具奏○諭楊文定奏請將已革副將發遣等語已革江蘇太湖協副將劉長清經該署督派帶船渡兵乃於瓜州失守之後竟任聽各船渙散自行潛往狼山僅予革職不足蔽辜劉長清著卽發往新疆效力贖罪以示懲儆○楊文定奏臣於本

月十九日統帶水師副將李德麟等督率各船駛至北固山及大馬頭地方見有賊船數十隻隨卽開礮轟擊賊匪紛紛上岸內有黃衣賊目二名均被擊斃賊船亦開礮迎拒我船隨擊隨進行至瓜州口見有賊船排列如林岸上又圍築木城安設礮位該逆水陸開礮拒敵我船奮力攻擊復獲賊船二隻生擒賊匪二十二名隨將該二船焚毀又燒大賊船七隻擊壞賊船百餘隻約計斃賊數百人 上諭軍機大臣等此次水師各船在北固山等處擊斃賊目二人復進至瓜州口焚毀擊壞賊船多隻斃賊數百人勦辦尙爲得手陸路大兵亦先後據琦善向榮等奏報屢次獲勝軍威大振惟賊船橫梗江中往來自如必須先將水面之賊設法肅清並將鎮江剋期收復則江甯揚州大股賊匪南北隔絕彼此不能相顧兩路大兵進剿更易爲力見在上海雇到浙江各艇船已有

二十餘隻再浙江已報啟程之師船及上海之夾板船二隻此時諒均駛到前據向榮奏業經豫備船礮火具在當塗一帶停泊專俟下游師船駛到即可前後夾擊楊文定統帶師船一俟齊備卽一面知會南北兩岸同日進攻並一面密約向榮與上海各船兩路會剿兵貴神速總宜相機剋期進剿萬不可稍有遷延致誤事機將此由六百里諭令知之○向榮許乃釗奏查該逆自七橋甕鍾山兩處險要並失附近各營皆不能守先後自焚者二十餘座東南賊壘十去其九卽西南隅之木城亦復自行燒毀惟於各城門外深溝高壘爲退守計近又探聞於城北一面東西兩旁各築土城一道其地離下關較近所有賊船皆聚於此臣恐該逆屢戰失利且兩旬以來解散賊黨不下三四萬人其勢日孤萬一自知難守竟從江面他竄追剿更難爲力臣等再四熟商不如緩攻金

陵先從水上去其船隻使江甯鎮江揚州三城之賊首尾不能兼顧然後可以制其死命查三城形勢鎮江最爲扼要蓋京口與瓜州相對而京口又爲上海兵船進攻必由之路先復京口則揚州江甯之賊應援自多中阻臣早擬從此入手因上游礮船下游兵船未能剋期並到是以不敢輕舉慮應翔礮船到後卽令與臣向榮之子向繼雄督帶礮船二十八隻先由當塗開至江甯境內小河口以扼上游一面派鄭魁士隨同督臣楊文定由江陰一路督帶上游艇船及三板等船四十餘隻從圖山關順風上擊尙恐各船不能迅速隨又添派總兵和春沿江催督此臣所籌水師大略情形也提督鄧紹良駐紮丹陽原帶精兵三千名又續撥川兵五百名廣東兵六百名抽撥無錫防堵浙兵四百五十名廣勇八百名令其統領會同副都統文藝管帶駐防兵八千名由馬陵新豐

陸路進攻鎮城臨時再添派得力兵將前去爲水陸夾擊之計探聞賊船江上林立防禦甚嚴我軍礮船兵船共止七十餘隻且上下分爲兩處多寡未免懸殊然不亟將江面肅清則該逆北竄回竄在在堪虞今大營陸路之兵由南而西漸近江口可與上游礮船聲勢聯絡鄧紹良兵進攻鎮城又與下游艇船三板船互相策應陸兵相助水師亦不嫌其單鎮江之賊見已被困不能更擾蘇常至金陵城南見又陸續安營設法相機進剿此係東壩必由之路自可無虞竄往至溧水高淳等處臣許乃釗已札飭該縣團練鄉勇以助聲勢見在金陵近城各鄉亦皆一律團練遇有長髮真賊鄉民立時格殺不致零星逸出琦善等音信頻通遇有緊要事宜無不詳細函商如探有逆賊他竄形迹總當隨時知會合力追剿上諭向榮許乃釗奏稱先從水上去其船隻使三城之賊首

尾不能兼顧又以三城形勢鎮江最爲扼要先復京口則賊之應援自多中阻各等情與朕今日寄諭楊文定意見正相昭合該大臣務當相機妥籌水陸夾攻總以神速爲妙萬不可遷延貽誤惟金陵大股賊匪堅拒不出且逆首均在城中必須嚴防奔突毋任乘閒竄逸應如何設計破城並著密籌辦理仍隨時知照琦善南北同時進攻毋失事機又片奏探有夷人火輪船隻駛過鎮江徑往江甯與本日楊文定所奏略同著卽密飭上海道吳健彰令其設法曉諭查得實情再行覈辦見在惟當督飭礮船於大江上下游合力剿賊先其所急若能將江面賊船痛加轟擊燒毀水陸夾攻殄滅羣醜當不至別生枝節且賊匪一經剿除與上海通商馬頭毫無阻礙該夷等亦可相安又片奏難民逃出不下四五萬人分別給貲遣散自應如此辦理惟人數眾多難保無奸細溷迹其

中著一面撫恤仍一面稽查毋致墮賊奸計其糧臺委員西金額
收集駐防兵五百餘人隨同大營習練一節此項官兵爲數無幾
且係全家被難之餘著毋庸隨營打仗以示體恤將此由六百里
諭知向榮楊文定許乃釗並傳諭彭玉雯知之○江南河道總督
楊以增奏遵查揚州附近州縣各官似與賊匪不相爲仇得旨確
切查明不准絲毫隱飾朕聞揚州一帶閭閻門戶上俱貼順字民
心不固皆地方庸吏作俑此等不肖官員任伊依違尸祿皆朕無
知人之明不知督撫大吏知愧否汝若照例委查曲爲掩飾惑於
積陰功之說不知此等人正不足惜若曲護之則彼之效死勿去
者何由申憤辦此等事失於仁正是無陰功也○以載齡爲左副
都御史由光祿寺卿遷○是月加賑山東濟甯等八州縣被水災民一月
口糧蠲緩江南蘇州等五府州被擾新舊額賦